

萬 有 文 庫

第一集一千種


王 雲 五 主 編

白 香 山 集

(十)

白 居 易 著

商 務 印 書 館 發 行





THE UNIVERSITY OF CHICAGO
LIBRARY

1000 S. EAST ASIAN BLDG.
CHICAGO, ILL. 60607

UNIVERSITY OF CHICAGO PRESS



白香山集

(十)

白居易著

國學基本叢書

編主五雲王
庫文有萬

種千一集一第

集山香白

冊十

著易居白

路 南 河 海 上
五 雲 王 人 行 發

路 南 河 海 上
館 書 印 務 商 所 刷 印

埠 各 及 海 上
館 書 印 務 商 所 行 發

版 初 月 二 十 年 二 十 二 國 民 華 中

究 必 印 翻 權 作 著 有 書 此

The Complete Library

Edited by

Y. W. WONG

THE COMPLETE WORK OF PÊ CHÜ I

BY PÊ CHÜ I

PUBLISHED BY Y. W. WONG

THE COMMERCIAL PRESS, LTD.

Shanghai, China

1933

All Rights Reserved

白香山集

卷六十四

律詩 凡一百首

六年冬暮贈崔常侍晦叔 時爲河南尹

鬢毛霜一色。光景水爭流。易過唯冬日。難銷是老愁。香開綠蟻酒。煖擁褐綾裘。已共崔君約。樽前倒卽休。

戲招諸客

黃醅綠醕迎冬熟。絳帳紅爐逐夜開。誰道洛中多逸客。不將書喚不曾來。

十二月二十三日作兼呈晦叔

案頭曆日雖未盡。向後唯殘六七行。牀下酒瓶雖不滿。猶應醉得兩三場。病身不許依年老。拙宦虛教逐日忙。聞健偷閑且勤飲。一盃之外莫思量。

七年元日對酒五首

慶弔經過懶。逢迎拜跪遲。不因時節日。豈覺此時衰。

又一首

衆老憂添歲。余衰喜入春。年開第七秩。屈指幾多人。

又一首

三盃藍尾酒。一櫺膠牙餠。除却崔常侍。無人共我爭。

又一首

今朝吳與洛。相憶一欣然。夢得君知否。俱過本命年。

又一首

同歲崔何在。同年杜又無。應無藏避處。只有且歡娛。

七年春題府廳

潦倒守三川。因循涉四年。推誠廢鉤距。示恥用蒲鞭。以此稱公事。將何銷俸錢。雖非好官職。歲久亦妨賢。

早春醉吟寄太原令狐相公蘇州劉郎中

雪夜閑遊多秉燭。花時暫出亦提壺。別來少遇新詩敵。老去難逢舊飲徒。大振威名降北虜。勤行惠化活東吳。不知歌酒騰騰興。得似河南醉尹無。

洛下送牛相公出鎮淮南

北闕至東京。風光十六程。坐移丞相閣。春入廣陵城。紅旆擁雙節。白鬚無一莖。萬人開路看。百吏立班迎。闔外君彌重。樽前我亦榮。何須身自得。將相是門生。

箏

雲髻飄蕭綠。花顏旖旎紅。雙眸翦秋水。十指剝春葱。楚豔爲門閥。秦聲是女工。甲鳴銀玦瑩。柱觸玉玲瓏。緩苦啼嫌月。鶯嬌語詆風。移愁來手底。送恨入絃中。趙瑟清相似。胡琴鬧不同。慢彈迴斷鴈。急奏轉飛蓬。

霜瓊鏘還委。冰泉咽復通。珠聯千拍碎。刀截一聲終。倚麗精神定。矜能態融。歌時情不斷。休去思無窮。燈下青春夜。樽前白首翁。且聽應得在。老耳未多聾。

洛中春遊呈諸親友

莫歎年將暮。須憐歲又新。府中三遇臘。洛下五逢春。春樹花珠顆。春塘水麴塵。春娃無氣力。春馬有精神。並轡鞭徐動。連盤酒慢巡。經過舊鄰里。追逐好交親。笑語銷閑日。酣歌送老身。一生歡樂事。亦不少於人。

酬舒三員外見贈長句

自請假來多少日。五旬光景似須臾。已判到老爲狂客。不分當春作病夫。楊柳花飄新白雪。櫻桃子綴小紅珠。頭風不敢多多飲。能酌三分相勸無。

將歸一絕

欲去公門返野扉。預思泉竹已依依。更憐家醞迎春熟。一甕醞酬待我歸。

罷府歸舊居 自此後重授賓客歸履道宅作

陋巷乘籃入。朱門挂印迴。腰間拋組綬。纓上拂塵埃。屈曲閑池沼。無非手自開。青蒼好竹樹。亦是眼看栽。石片擡琴匣。松枝闌酒盃。此生終老處。昨日却歸來。

睡覺偶吟

官初罷後歸來夜。天欲明前睡覺時。起坐思量更無事。身心安樂復誰知。

問支琴石

疑因星隕空中落。歎被泥埋澗底沉。天上定應勝地上。支機未必及支琴。提攜拂拭知恩否。雖不能言合有心。

自喜

身慵難勉強。性拙易遲迴。布被辰時起。柴門午後開。忙驅能者去。閑逐鈍人來。自喜誰能會。無才勝有才。裴常侍以題薔薇架十八韻見示。因廣爲三十韻以和之。

託質依高架。攢華對小堂。晚開春去後。獨秀院中央。霽景朱明早。芳時白晝長。穠因天與色。麗共日爭光。翦碧排千萼。研朱染萬房。烟條塗石綠。粉蕊撲雌黃。根動彤雲湧。枝搖赤羽翔。九華燈炫轉。七寶帳煒煌。淑氣熏行徑。清陰接步廊。照梁迷藻梲。耀壁變雕牆。爛若叢燃火。殷於葉得霜。燕脂含臉笑。蘇合裊衣香。洽恰濡晨露。玲瓏漏夕陽。合羅排勘輓。醉暈淺深粧。乍見疑迴面。遙看誤斷腸。風朝舞飛鷺。雨夜泣蕭娘。桃李慚無語。芝蘭讓不芳。山榴何細碎。石竹苦尋常。蕙慘隈欄避。蓮羞映浦藏。怯教蕉葉戰。妬得柳花狂。豈可輕嘲詠。應須痛比方。畫屏風自展。繡傘蓋誰張。翠錦挑成字。丹砂印著行。猩猩凝血點。瑟瑟鑿金匡。散亂萎紅片。尖纖嫩紫芒。觸僧飄毳褐。留妓冒羅裳。寡和陽春曲。多情騎省郎。緣誇美顏色。引出好文章。東顧辭仁里。西歸入帝鄉。假如君愛殺。留著莫移將。

感舊詩卷

夜深吟罷一長吁。老淚燈前溼白鬚。二十年前舊詩卷。十人酬和九人無。

酬李二十侍郎

筍老蘭長花漸稀。衰翁相對惜芳菲。殘鶯著雨慵休囀。落絮無風凝不飛。行掇木芽供野食。坐牽蘿蔓挂朝衣。十年分手今同醉。醉未如泥莫道歸。

和夢得

綸閣沉沉無寵命。蘇臺籍籍有能聲。豈唯不得清文力。但恐空傳冗吏名。郎署迴翔何水部。江湖留滯謝宣城。所嗟非獨君如此。自古才難共命爭。

贈草堂宗密上人

吾師道與佛相應。念念無爲法法能。口藏宣傳十二部。心臺照耀百千燈。盡離文字非中道。長住虛空是小乘。少有人知菩薩行。世間只是重高僧。

喜照密閑實四上人見過

紫衫朝士白髯翁。與俗乖疎與道通。官秩三週分洛下。交遊一半在僧中。臭襦世界終須出。香火因緣久願同。齋後將何充供養。西軒泉石北窗風。

贈皇甫六張十五李二十三賓客

昨日三川新罷守。今年四皓盡分司。幸陪散秩同居日。好是登山臨水時。家未苦貧常醞酒。身雖衰病尙吟詩。龍門泉石香山月。早晚同遊報一期。

微之敦詩晦叔相次長逝。巋然自傷。因成二絕。

併失鸚鵡侶。空留麋鹿身。只應嵩洛下。長作獨遊人。

又一首

長夜君先去。殘年我幾何。秋風滿衫淚。泉下故人多。

池上閑詠

青莎臺上起書樓。綠藻潭中繫釣舟。日晚愛行深竹裏。月明多上小橋頭。顰嘗新酒還成醉。亦出中門便常遊。一部清商聊送老。白鬚蕭颯管絃秋。

涼風歎

昨夜涼風又颯然。螢飄葉墜臥床前。逢秋莫歎須知分。已過潘安三十年。

和高僕射罷節度讓尚書授少保分司喜遂山水之作

顰辭八座罷雙旌。便作登山臨水行。能以忠貞酬重任。不將富貴礙高情。朱門出去簪纓從。絳帳歸來歌吹迎。鞍轡闌裝光滿馬。何人信道是書生。

送考功崔郎中赴闕

稱意新官又少年。秋涼身健好朝天。青雲上了無多路。却要徐驅穩著鞭。

重修香山寺畢題二十二韻以紀之

闕塞龍門口。祇園鷲嶺頭。曾隨滅劫壞。今遇勝緣修。再瑩新金刹。重裝舊石樓。病僧皆引起。忙客亦淹留。四望窮沙界。孤標出贍洲。地圖鋪雒邑。天柱倚崧丘。兩面蒼蒼岸。中心瑟瑟流。波翻八灘雪。堰護一潭油。臺殿朝彌麗。房廊夜更幽。千花高下塔。一葉往來舟。岫合雲初吐。林開霧半收。靜聞樵子語。遠聽棹郎謳。

官散殊無事。身閑甚自由。吟來攜筆硯。宿去抱衾裯。霽月當軒白。涼風滿篋秋。烟香封藥竈。泉冷洗茶甌。南祖心應學。西方社可投。先宜知止足。次要悟浮休。覺路隨方樂。迷塗到老愁。須除愛名障。莫作戀家囚。便合窮年住。何言竟日遊。可憐終老地。此是我菟裘。

送楊八給事赴常州

無嗟別青瑣。且喜擁朱輪。五十得三品。百千無一人。須勤念黎庶。莫苦憶交親。此外無過醉。毗陵何限春。

聞歌者唱微之詩

新詩絕筆聲名歇。舊卷生塵篋笥深。時向歌中聞一句。未容傾耳已傷心。

醉送李二十常侍赴鎮浙東

靖安客舍花枝下。共脫青衫典濁醪。今日洛橋還醉別。金盃翻汗麒麟袍。喧闐夙駕君脂轄。酩酊離筵我藉糟。好去商山紫芝伴。珊瑚鞭動馬頭高。

醉別程秀才

五度龍門點額迴。却緣多藝復多才。貧泥客路粘難出。愁鎖鄉心掣不開。何必更遊京國去。不如且入醉鄉來。吳絃楚調瀟湘弄。爲我殷勤送一盃。

自詠

白衣居士紫芝仙。半醉行歌半坐禪。今日維摩兼飲酒。當時綺季不論錢。等閑池上留賓客。隨事燈前有管絃。但問此身銷得否。分司氣味不論年。

把酒思閑事二首

把酒思閑事。春愁誰最深。乞錢羈客面。落第舉人心。月下低眉立。燈前抱膝吟。憑君勸一醉。勝與萬黃金。

又一首

把酒思閑事。春嬌何處多。試鞍新白馬。弄鏡小青娥。掌上初教舞。花前欲按歌。憑君勸一醉。勸了問如何。

衰荷

白露凋花花不殘。涼風吹葉葉初乾。無人解愛蕭條境。曾遶衰叢一匝看。

池上送考功崔郎中兼別房資二妓

文昌列宿徵還日。洛浦行雲放散時。鷓鴣上天花逐水。無因再會白家池。

自問

依仁臺廢悲風晚。履信池荒宿草春。自問老身騎馬出。洛陽城裏覓何人。

送陳許高僕射赴鎮

敦詩說禮中軍帥。重士輕財大丈夫。常與師徒同苦樂。不教親故隔榮枯。花鈿坐遠黃金印。絲管行隨白玉壺。商皓老狂唯愛醉。時時能寄酒錢無。

青氈帳二十韻

合聚千羊毳。施張百子氍。骨盤邊柳健。色染塞藍鮮。北製因戎剋。南移逐虜邊。汰風吹不動。禦雨溼彌堅。有頂中央聳。無隅四鬲圓。旁通門豁爾。內密氣溫然。遠別關山外。初安庭戶前。影孤明月夜。價重苦寒年。

軟煖圍氈。鎗撻束管絃。最宜霜後地。偏稱雪中天。側置低歌座。平鋪小舞筵。閑多揭簾入。醉便擁袍眠。
鐵檠移燈背。銀囊帶火懸。深藏曉蘭焰。暗貯宿香烟。獸炭休親近。狐裘可棄捐。硯溫融凍墨。瓶暖變春泉。
蕙帳徒招隱。茅菴浪坐禪。貧僧應歎羨。寒士定留連。賓客於中接。兒孫向後傳。王家誇舊物。未及此青氈。

答夢得秋日書懷見寄

幸免非常病。甘當本分衰。眼昏燈最覺。腰瘦帶先知。樹葉霜紅日。髭鬚雪白時。悲愁緣欲老。老過却無悲。

同諸客題于家公主舊宅

平陽舊宅少人遊。應是遊人到卽愁。布穀烏啼桃李院。絡絲蟲怨鳳凰樓。臺傾滑石猶殘砌。簾斷眞珠不
滿鉤。聞道至今蕭史在。髭鬚雪白向明州。

答夢得八月十五日夜翫月見寄

南國碧雲客。東京白首翁。松江初有月。伊水正無風。遠思兩鄉斷。清光千里同。不知娃館上。何似石樓中。

初冬早起寄夢得

起戴烏紗帽。行披白布裘。爐溫先煖酒。手冷未梳頭。早景烟霜白。初寒鳥雀愁。詩成遣誰和。還是寄蘇州。

冬夜聽高調涼州

樓上金風聲漸緊。月中銀字韻初調。促張絃柱吹高管。一曲涼州入沈寥。

香山寺二絕

空門寂靜老夫閑。伴鳥隨雲往復還。家醞滿瓶書滿架。半移生計入香山。

愛風巖上攀松蓋。戀月潭邊坐石稜。且共雲泉結緣境。他生當作此山僧。

送舒著作重授省郎赴闕

三歲相依在雒都。遊花宴月飽歡娛。惜別笙歌多怨咽。願留軒蓋少踟蹰。劍磨光彩依前出。鵬舉風雲逐後驅。從此求閑應不得。更能重醉白家無。

同諸客嘲雪中馬上妓

珊瑚鞭鞞馬踟蹰。引手低蛾索一盃。腰爲逆風成弱柳。面因衝冷作凝酥。銀篋穩簪烏羅帽。花襜宜乘叱撥駒。雪裏君看何所似。王昭君妹寫真圖。

喜劉蘇州恩賜金紫遙想賀宴以詩慶之

海內姑蘇太守賢。恩加章綬豈徒然。賀賓喜色欺盃酒。醉妓歡聲遏管絃。魚佩葺鱗光照地。鶻銜瑞帶勢冲天。莫嫌鬢上些些白。金紫由來稱長年。

藍田劉明府攜酎相過與皇甫郎中卯時同飲醉後贈之

臘月九日煖寒客。卯時十分空腹盃。玄晏舞狂烏帽落。藍田醉倒玉山頽。貌偷花色老慙去。歌踏柳枝春暗來。不爲劉家賢聖物。愁翁笑口太難開。

劉蘇州以華亭一鶴遠寄以詩謝之

老鶴風姿異。衰翁詩思深。素毛如我鬢。丹頂似君心。松際雪相映。雞羣塵不侵。殷勤遠來意。一隻重千金。

早春憶蘇州寄夢得

吳苑四時風景好。就中偏好是春天。霞光照後殷於火。水色晴來嫩似煙。士女笙歌宜月下。使君金紫稱花前。試知歡樂堪留戀。其奈離鄉已四年。

嘗新酒憶晦叔二首

樽裏看無色。盃中動有光。自君拋我去。此物共誰嘗。

又一首

世上強欺弱。人間醉勝醒。自君拋我去。此語更誰聽。

負春

病來道士教調氣。老去山僧勸坐禪。辜負春風楊柳曲。去年斷酒到今年。

池上閑吟二首

高臥閑行自在身。池邊六見柳條新。幸逢堯舜無爲日。得作羲皇向上人。四皓再除猶且健。三川罷守未全貧。莫愁客到無供給。家醞香濃野菜春。非莊非宅非蘭若。竹樹池亭十畝餘。非道非僧非俗吏。褐裘烏帽閉門居。夢遊信意寧殊蝶。心樂身閑便是魚。雖未定知生與死。其間勝負兩何如。

早春招張賓客

久雨初晴天氣新。風煙草樹盡欣欣。雖當冷落衰殘日。還有陽和暖活身。池色溶溶藍染水。花光焰焰火燒春。商山老伴相收拾。不用隨他年少人。

營閑事

自笑營閑事。從朝到日斜。澆畦引泉脈。掃徑避蘭芽。暖變牆衣色。晴催木筆花。桃根知酒渴。晚送一甌茶。

感春

老思不禁春。風光照眼新。花房紅鳥鶯。池浪碧魚鱗。倚棹誰爲伴。持盃自問身。心情多少在。六十二三人。

春池上戲贈李郎中

滿池春水何人愛。唯我迴看指似君。直似按盞新汁色。與君南宅染羅裙。

翫半開花贈皇甫郎中 八年寒食日池東小樓上作

勿訝春來晚。無嫌花發遲。人憐全盛日。我愛半開時。紫蠟黏爲蒂。紅蘇點作蕤。成都新夾纈。梁漢碎烟脂。樹杪真珠顆。牆頭少女兒。淺深粧駁落。高下火參差。蝶戲爭香朵。鶯啼選穩枝。好教郎作伴。合共酒相隨。醉翫無勝此。狂嘲更讓誰。猶殘少年興。未似老人詩。西日憑輕照。東風莫殺吹。明朝應爛熳。後夜更離披。林下遙相憶。樽前暗有期。銜盃嚼藥思。唯我與君知。

池邊

柳老香絲宛。荷新細扇圓。殘春深樹裏。斜日小樓前。醉遣收盃杓。閑聽理管絃。池邊更無事。看補採蓮船。家釀新熟。每嘗輒醉。妻姪等勸令小飲。因成長句以諭之。

君應怪我朝朝飲。不說向君君不知。身上幸無疼痛處。甕頭正是撇嘗時。劉妻勸諫夫休醉。王姪分疎叔不癡。六十三翁頭雪白。假如醒得欲何爲。

送常秀才下第東歸

東歸多旅恨。西上少知音。寒食看花眼。春風落第心。百憂當二月。一醉直千金。到處公卿席。無辭酒盞深。且遊。

題王家莊臨水柳亭

手裏一盃滿。心中百事休。春應唯仰醉。老更不禁愁。弄水迴船尾。尋花信馬頭。眼看筋力減。遊得且須遊。弱柳綠堤種。虛亭壓水開。條疑逐風去。波欲上階來。翠羽偷魚入。紅腰學舞迴。春愁正無緒。爭不盡殘盃。

題令狐家木蘭花

膩如玉指塗朱粉。光似金刀翦紫霞。從此時時春夢裏。應添一樹女郎花。

拜表迴閑遊

玉佩金章紫花綬。紵衫藤帶白綸巾。晨興拜表稱朝士。晚出遊山作野人。達磨傳心今息念。玄元留語遣同塵。八關淨戒齋銷日。一曲狂歌醉送春。酒肆法堂方丈室。其間豈是兩般身。

西街渠中種蓮疊石頗有幽致偶題小樓

朱檻低牆上。清流小閣前。雇人栽菡萏。買石造潺湲。影落江心月。聲移谷口泉。閑看卷簾坐。醉聽掩窗眠。路笑淘官水。家愁費料錢。是非君莫問。一對一翛然。

晚春閑居楊工部寄詩楊常州寄茶同到因以長句答之

宿醒寂寞眠初起。春意闌珊日又斜。勸我加飧因早筍。恨人休醉是殘花。悶吟工部新來句。渴飲毗陵遠

到茶。兄弟東西官職冷。門前車馬向誰家。

玉泉寺南三里澗下多深紅。躑躅繁豔殊常。感惜題詩。以示遊者。

玉泉南澗花奇怪。不似花叢似火堆。今日多情唯我到。每年無故爲誰開。寧辭辛苦行三里。更與留連飲兩盃。猶有一般辜負事。不將歌舞管絃來。

早服雲母散

曉服雲英漱井華。寥然身若在烟霞。藥銷日晏三匙飯。酒渴春深一碗茶。每夜坐禪觀水月。有時行醉翫風花。淨名事理人難解。身不出家心出家。

三月晦日日晚聞鳥聲

晚來林鳥語殷勤。似惜風光說向人。遣脫破袍勞報暖。催沽美酒敢辭貧。聲聲勸醉應須醉。一歲唯殘半日春。

早夏遊平原迴

夏早日初長。南風草木香。肩輿頗平穩。澗路甚清涼。紫蕨行看採。青梅旋摘嘗。療飢兼解渴。一盞冷雲漿。

宿天竺寺迴

野寺經三宿。都城復一還。家仍念婚嫁。身尚繫官班。蕭洒秋臨水。沉吟晚下山。長閑猶未得。逐日且偷閑。

侍中晉公欲到東洛。先蒙書問。期宿龍門。思往感今。輒獻長句。

昔蒙興化池頭送。今許龍門潭上期。聚散但慚長見念。榮枯安敢道相思。功成名遂來雖久。雲臥山遊去

未遲聞說風筋力在。只如初破蔡州時。

奉和晉公侍中蒙除留守行及洛師感悅發中斐然成詠。

鸞鳳翱翔在寥廓。貂蟬蕭洒出埃塵。致成堯舜升平代。收得夔龍強健身。拋擲功名還史冊。分張歡樂與交親。商山老皓雖休去。終是留侯門下人。

送劉五司馬赴任硤州兼寄崔使君。

位下才高多怨天。劉兄道勝獨恬然。貧於楊子兩三倍。老過榮公六七年。筆硯莫拋留壓案。簞瓢從陋也銷錢。郡丞自合當優禮。何況夷陵太守賢。

菩提寺上方晚眺

樓閣高低樹淺深。山光水色暝沈沈。嵩煙半卷青綃幕。伊浪平鋪綠綺衾。飛鳥滅時宜極目。遠風來處好開襟。誰知不離簪纓內。長得逍遙自在心。

楊柳枝詞八首

六么水調家家唱。白雪梅花處處吹。古歌舊曲君休聽。聽取新翻楊柳枝。陶令門前四五樹。亞夫營裏百千條。何似東都正二月。黃金枝映洛陽橋。依依嫋嫋復青青。勾引清風無恨情。白雪花繁空撲地。綠絲條弱不勝鶯。紅板江橋清酒旗。館娃宮暖日斜時。可憐雨歇東風定。萬樹千條各自垂。蘇州楊柳任君誇。更有錢塘勝館娃。若解多情尋小小。綠楊深處是蘇家。

蘇家小女舊知名。楊柳風前別有情。剝條盤作銀環樣。卷葉吹爲玉笛聲。
葉含濃露如啼眼。枝嫋輕風似舞腰。小樹不禁攀折苦。乞君留取兩三條。
人言柳葉似愁眉。更有愁腸似柳絲。柳絲挽斷腸牽斷。彼此應無續得期。

浪淘沙詞六首

一泊沙來一泊去。一重浪滅一重生。相攪相淘無歇日。會教山海一時平。
白浪茫茫與海連。平沙浩浩四無邊。暮去朝來淘不住。遂令東海變桑田。
青草湖中萬里程。黃梅雨裏一人行。愁見灘頭夜泊處。風翻暗浪打船聲。
借問江湖與海水。何似君情與妾心。相恨不如潮有信。相思始覺海非深。
海底飛塵終有日。山頭化石豈無時。誰道小郎拋小婦。船頭一去沒迴期。
隨波逐浪到天涯。遷客生還有幾家。却到帝鄉重富貴。請君莫忘浪淘沙。

卷六十五

律詩 凡八十二首

讀老子

言者不知知者默。此語吾聞於老君。若道老君是知者。緣何自著五千文。

讀莊子

莊生齊物同歸一。我道同中有不同。遂性逍遙雖一致。鸞鳳終校勝蛇虫。

讀禪經

須知諸相皆非相。若住無餘却有餘。言下忘言一時了。夢中說夢兩重虛。空花豈得兼求果。陽焰如何更覓魚。攝動是禪禪是動。不禪不動卽如如。

感興二首

吉凶禍福有來由。但要深知不要憂。只見火光燒潤屋。不聞風浪覆虛舟。名爲公器無多取。利是身災合少求。雖異匏瓜難不食。大都食足早宜休。魚能深入寧憂釣。鳥解高飛豈觸羅。熱處先爭炙手去。悔時其奈噬臍何。樽前誘得猩猩血。幕上偷安燕燕窠。我有一言君記取。世間自取苦人多。

問鶴

烏鳶爭食雀爭窠。獨立池邊風雪多。盡日踏冰翹一足。不鳴不動意如何。

代鶴答

鷹爪攫雞雛。肋折鵝拳蹴。鴈頭垂。何如斂翅水邊立。飛上雲松棲穩枝。

閑臥有所思二首

向夕褰簾臥枕琴。微涼入戶起開襟。偶因明月清風夜。忽想遷臣逐客心。何處投荒初恐懼。誰人遠澤正悲吟。始知洛下分司坐。一日安閑直萬金。

權門要路是身災。散地閑居少禍胎。今日憐君嶺南去。當時笑我洛中來。虫全性命緣無毒。木盡天年爲不材。大抵吉凶多自致。李斯一去二疏迴。

喜閑

蕭灑伊嵩下。優遊皇綺間。未曾一日悶。已得六年閑。魚鳥爲徒侶。煙霞是往還。伴僧禪閉目。迎客笑開顏。興發宵遊寺。慵時晝掩關。夜來風月好。悔不宿香山。

詩酒琴人例多薄。命予酷好三事。雅當此科。而所得已多。爲幸斯甚。偶成狂詠。聊寫愧懷。

愛琴愛酒愛詩客。多賤多窮多苦辛。中散步兵終不貴。孟郊張籍過於貧。一之已歎關於命。三者何堪併在身。只合飄零隨草木。誰教凌厲出風塵。榮名厚祿二千石。樂飲閑遊三十春。可得無厭時咄咄。猶言薄命不如人。

寄州州于駙馬使君三絕句

有花有酒有笙歌。其奈難逢親故何。近海饒風春足雨。白鬚太守悶時多。平陽音樂隨都尉。留滯三年在浙東。吳越聲邪無法用。莫教偷入管絃中。何郎小妓歌喉好。嚴老呼爲一串珠。海味腥鹹損聲氣。聽看猶得斷腸無。

閑臥

薄食常齋戒。散班同隱淪。佛容爲弟子。天許作閑人。唯置牀臨水。都無物近身。清風散髮臥。兼不要紗巾。春早秋初。因時卽事。兼寄浙東李侍郎。

春早秋初晝夜長。可憐天氣好年光。和風細動簾帷暖。清露微凝枕簟涼。窗下曉眠初減被。池邊晚坐乍移牀。閑從蕙草侵階綠。靜任槐花滿地黃。理曲管絃聞後院。熨衣燈火映深房。四時新境何人別。遙憶多情李侍郎。

新秋喜涼

過得炎蒸月。尤宜老病身。衣裳朝不潤。枕簟夜相親。樓月纖纖早。波風嫋嫋新。光陰與時節。先感是詩人。

初夏閑吟兼呈韋賓客

孟夏清和月。東都閑散官。體中無病痛。眼下未飢寒。世事閒常悶。交遊見卽歡。盃觴留客切。妓樂取人觀。雪鬢隨身老。雲心著處安。此中殊有味。試說向君看。

哭崔二十四常侍

貂冠初別九重門。馬鬣新封四尺墳。薤露歌詞非白雪。旌銘官爵是浮雲。伯倫每置隨身鍾。元亮先爲自祭文。莫道高風無繼者。一千年內有崔君。

奉酬侍中夏中雨後遊城南莊見示八韻

烏樹間林巒。雲收雨氣殘。四山嵐色重。五月水聲寒。老鶴兩三隻。新篁千萬竿。化成天竺寺。移得子陵灘。心覺閑彌貴。身緣健更歡。帝將風后待。人作謝公看。角里年雖老。高陽興未闌。佳辰不見召。爭免趁盃盤。

送兗州崔大夫駙馬赴鎮

戚里誇爲賢駙馬。儒家認作好詩人。魯侯不得辜風景。沂水年年有暮春。

少年問

少年怪我問如何。何事朝朝醉復歌。號作樂天應不錯。憂愁時少樂時多。

問少年

千首詩堆青玉案。十分酒寫白金盃。迴頭却問諸年少。作個狂夫得了無。

代琵琶弟子謝女師曹供奉寄新調弄譜

琵琶師在九重城。忽得書來喜且驚。一紙展開非舊譜。四絃翻出是新聲。蕤賓掩抑嬌多怨。散水玲瓏峭更清。珠顆淚霑金捍撥。紅粧弟子不勝情。

代林園戲贈

南院今秋遊宴少。西坊近日往來頻。假如宰相池亭好。作客何如作主人。

戲答林園

豈獨西坊來往頻。偷閑處處作遊人。衡門雖是棲遲地。不可終朝鑱老身。

重戲贈

集賢池館從他盛。履道林亭勿自輕。往往歸來嫌窄小。年年爲主莫無情。

重戲答

小水低亭自可親。大池高館不關身。林園莫妬裴家好。憎故憐新豈是人。

早秋登天宮寺閣贈諸客

天宮閣上醉蕭辰。絲管閑聽酒慢巡。爲向涼風清景道。今朝屬我兩三人。

曉上天津橋。閑望偶逢盧郎中。張員外。攜酒同傾。

上陽宮裏曉鍾後。天津橋頭殘月前。空闕境疑非下界。飄飄身似在寥天。星河隱映初生日。樓閣葱籠半出煙。此處相逢傾一盞。始知地上有神仙。

八月十五日夜同諸客翫月

月好共傳唯此夜。境閑皆是東都嵩山表。裏千重雪。洛水高低兩顆珠。清景難逢宜愛惜。白頭相勸強歡娛。誠知亦有來年會。保得晴明強健無。

對晚開夜合花贈皇甫郎中

移晚校一月。花遲過半年。紅開杪秋日。翠合欲昏天。白露滴不死。涼風吟更鮮。後時誰肯顧。唯我與君憐。醉遊平泉

狂歌箕踞酒樽前。眼不看人面向天。洛客最閑唯有我。一年四度到平泉。

題贈平泉韋徵君拾遺

箕穎千年後。唯君得古風。位留丹陛上。身入白雲中。躁靜心相背。高低跡不同。籠雞與梁鷲。不信有冥鴻。

酬皇甫郎中對新菊花見憶

愛菊高人吟逸韻。悲秋病客感衰懷。黃花助興方攜酒。紅葉添愁正滿階。居士葷腥今已斷。仙郎盃杓爲誰排。愧君相憶東籬下。擬廢重陽一日齋。

夜宴醉後留獻裴侍中

九燭臺前十二姝。主人留醉任歡娛。翩翩舞袖雙飛蝶。宛轉歌聲一索珠。坐久欲醒還酩酊。夜深初散又踟躕。南山賓客東山妓。此會人間曾有無。

和韋庶子遠坊赴宴未夜先歸之作兼呈裴員外

促席留歡日未曛。遠坊歸思已紛紛。無妨按轡行乘月。何必逃盃走似雲。銀燭忍拋楊柳曲。金鞍潛送石榴裙。到時常晚歸時早。笑樂三分校一分。

集賢池答侍中問

主人晚入皇城宿。問客徘徊何所須。池月幸閑無用處。今宵能借客遊無。

楊柳枝二十韻

小妓攜桃葉。新歌蹋柳枝。妝成翦燭後。醉起拂衫時。繡履嬌行緩。花筵笑上遲。身輕委迥雪。羅薄透凝脂。笙引簧頻煖。箏催柱數移。樂童翻怨調。才子與妍詞。便想人如樹。先將髮比絲。風條搖兩帶。煙葉帖雙眉。口動櫻桃破。鬢低翡翠垂。枝柔腰嫋娜。荑嫩手葳蕤。唳鶴晴呼侶。哀猿夜叫兒。玉敲音歷歷。珠貫字纍纍。袖爲收聲點。斂因赴節遺。重重遍頭別。一一拍心知。塞北愁攀折。江南苦別離。黃遮金谷岸。綠映杏園池。春惜芳華好。秋憐顏色衰。敢來歌裏唱。勝向笛中吹。曲罷那能立。情多不自持。纏頭無別物。一首斷腸詩。

答皇甫十郎中秋深酒熟見憶

烟景冷蒼茫。秋深夜夜霜。爲思池上酌。先覺甕頭香。未暇傾巾漉。還應染指嘗。醜醜慚氣味。琥珀讓晶光。

若許陪歌席。須容散道場。月終齋戒畢。猶及菊花黃。

老去

老去愧妻兒。冬來有勸詞。煖寒從飲酒。衝冷少吟詩。戰勝心還壯。齋勤體校羸。由來世間法。損益合相隨。

送宗實上人遊江南

忽辭洛下緣何事。擬向江南住幾時。每過渡頭應問法。無妨菩薩是船師。

和同州楊侍郎誇柘枝見寄

細吟馮翊使君詩。憶作餘杭太守時。君有一般輸我事。柘枝看校十年遲。

冬初酒熟

霜繁脆庭柳。風利翦池荷。月色曉彌苦。鳥聲寒更多。秋懷久寥落。冬計又如何。一甕新醅酒。萍浮春水波。

又一首

酒熟無來客。因成獨酌謠。人間老黃綺。地上散松喬。忽忽醒還醉。悠悠暮復朝。殘年多少在。盡付此中銷。

送姚杭州赴任因思舊遊二首

與君細話杭州事。爲我留心莫等閑。閩里固宜勤撫恤。樓臺亦要數躋攀。笙歌縹緲虛空裏。風月依稀夢想間。且喜詩人重管領。遙飛一盞賀江山。

渺渺錢唐路幾千。想君到後事依然。靜逢竺寺援偷橘。閑看蘇家女採蓮。故妓數人憑問訊。新詩兩首倩留傳。舍人雖健無多興。老校當時八九年。

寄李相公

漸老只謀歡。雖貧不要官。唯求造化力。試爲駐春看。

冬日平泉路晚歸

山路難行日易斜。烟村霜樹欲棲鴉。夜歸不到應閑事。熟飲三盃卽是家。

利仁北街作

草色斑斑春雨晴。利仁坊北面西行。踟躕立馬緣何事。認得張家歌吹聲。

洛陽堰閑行

洛陽堰上新晴日。長夏門前欲暮春。遇酒卽沽逢樹歇。七年此地作閑人。

過永甯

村杏野桃繁似雪。行人不醉爲誰開。賴逢山縣盧明府。引我花前勸一盃。

往年稠桑曾喪白馬。題詩廳壁。今來尙存。又復感懷。更題絕句。

路傍埋骨蒿草合。壁上題詩塵蘚生。馬死七年猶悵望。自知無乃太多情。

羅敷水

野店東頭花落處。一條流水號羅敷。芳魂豔骨知何在。春草茫茫墓亦無。

路逢青州王大夫赴鎮立馬贈別

大旆擁金羈。書生得者稀。何勞問官職。豈不見光輝。赫赫人爭看。翩翩馬欲飛。不期前歲尹。駐節語依依。

和楊同州寒食乾坑會後聞楊工部欲到知予與工部有宿醒

夜飲歸常晚。朝眠起更遲。舉頭中酒後。引手索茶時。拂枕青長袖。欵簪白接鬮。宿醒無興味。先是肺神知。

和劉汝州酬侍中見寄長句因書集賢坊勝事戲而問之

洛川汝海封畿接。履道集賢來往頻。一復時程雖不遠。百餘步地更相親。朱門陪宴多投轄。青眼留歡任吐茵。聞道郡齋還有酒。風前月下對何人。

池上二絕

山僧對碁坐。局上竹陰清。映竹無人見。時聞下子聲。

又一首

小娃撐小艇。偷採白蓮迴。不解藏蹤跡。浮萍一道開。

白羽扇

素是自然色。圓因裁製功。颯如松起籟。飄似鶴翻空。盛夏不銷雪。終年無盡風。引秋生手裏。藏月入懷中。塵尾斑非匹。蒲葵陋不同。何人稱相對。清瘦白鬚翁。

五月齋戒。罷宴徹樂。聞韋賓客皇甫郎中飲會亦稀。又知欲攜酒饌出齋。先以長句呈謝。

妓房匣鏡滿紅埃。酒庫封瓶生綠苔。居士爾時緣護戒。車公何事亦停盃。散齋香火今朝散。開素盤筵後日開。隨意往還君莫怪。坐禪僧去飲徒來。

閑園獨賞

午後郊園靜。晴來景物新。雨添山氣色。風借水精神。永日若爲度。獨遊何所親。仙禽狎君子。芳樹倚佳人。蟻鬪王爭肉。蝸移台逐身。蝶雙知伉儷。蜂聚見君臣。蠢動形雖小。逍遙性卽均。不知鵬與鶴。相去幾微塵。

種柳三詠

白頭種松桂。早晚見成林。不及栽楊柳。明年便有陰。春風爲催促。副取老人心。從君種楊柳。夾水意如何。准擬三年後。青絲拂綠波。仍教小樓上。對唱柳枝歌。更想五年後。千千條麴塵。路旁深映月。樓上闇藏春。愁殺閑遊客。聞歌不見人。

偶吟

好官病免曾三度。散地歸休已七年。老自退閑非世棄。貧蒙強健是天憐。韋荆南去留春服。王侍中來乞酒錢。便得一年生計足。與君美食復甘眠。

池上卽事

移牀避日依松竹。解帶當風掛薜蘿。鈿砌池心綠蘋合。粉開花面白蓮多。久陰新霽宜絲管。苦熱初涼入綺羅。家醞瓶空人客絕。今宵爭奈月明何。

南塘暝興

水色昏猶白。霞光暗漸無。風荷搖破扇。波月動連珠。蟋蟀啼相應。鴛鴦宿不孤。小僮頻報夜。歸步尙踟蹰。

小宅

小宅里閭接。疎籬雞犬通。渠分南巷水。窗借北家風。庾信園殊小。陶潛屋不豐。何勞問寬窄。寬窄在心中。

諭親友

適情處處皆安樂。大抵園林勝市朝。煩鬧榮華猶易過。優閑福祿更難銷。自憐老大宜疎散。却被交親款寂寥。終日相逢不相見。兩心相去一何遙。

龍門送別皇甫澤州赴任韋山人南遊

隼旗歸洛知何日。鶴駕還嵩莫過春。惆悵香山雲水冷。明朝便是獨遊人。

劉蘇州寄釀酒糯米李浙東寄楊柳枝舞衫偶因嘗酒試衫輒成長句寄謝之

柳枝慢踏試雙袖。桑落初香嘗一盃。金屑醅濃吳米釀。銀泥衫穩越娃裁。舞時已覺愁眉展。醉後仍教笑口開。慚愧故人憐寂寞。三千里外寄歡來。

詔授同州刺史病不赴任因詠所懷

同州慵不去。此意復誰知。誠愛俸錢厚。其如身力衰。可憐病判案。何似醉吟詩。勞逸懸相遠。行藏決不疑。徒煩人勸諫。只合自尋思。白髮來無限。青山去有期。野心唯怕鬧。家口莫愁飢。賣却新昌宅。聊充送老資。

寄楊六侍郎

西戶最榮君好去。左馮雖穩我慵來。秋風一筴鱸魚鱸。張翰搖頭喚不迴。

韋七自太子賓客再除祕書監以長句賀而餞之

離筵莫愴且同歡。共賀新恩拜舊官。屈就商山伴麋鹿。好歸芸閣狎鷓鴣。落星石上蒼苔古。畫鶴廳前白露寒。老監姓名應在壁。相思試爲拂塵看。

酒熟憶皇甫十

新酒此時熟。故人何日來。自從金谷別。不見玉山頽。疎索柳花盃。寂寥荷葉盃。今冬問氈帳。雪裏爲誰開。

九年十一月二十一日感事而作

禍福茫茫不可期。大都早退似先知。當君白首同歸日。是我青山獨往時。顧索素琴應不暇。憶牽黃犬定難追。麒麟作脯龍爲醢。何似泥中曳尾龜。

卽事重題

重裘煖帽寬氈履。小閣低窗深地爐。身穩心安眠未起。西京朝士得知無。

將歸渭村先寄舍弟

一年年覺此身衰。一日日知前事非。詠月嘲花先要減。登山臨水亦宜稀。子平嫁娶貧中畢。元亮田園醉裏歸。爲報阿連寒食下。與吾釀酒掃柴扉。

看嵩洛有歎

今日看嵩洛。迴頭歎世間。榮華急如水。憂患大於山。見苦方知樂。經忙始愛閑。未聞籠裏鳥。飛出肯飛還。

詠懷

隨緣逐處便安閑。不住朝廷不入山。心似虛舟浮水上。身同宿鳥寄林間。向平婚嫁了無累。馮翊符章封却還。處分貧家殘活計。正如身後莫相關。

詠老贈夢得

與君俱老也。自問老何如。眼澁夜先臥。頭慵朝未梳。有時扶杖出。盡日閉門居。懶照新磨鏡。休看小字書。情於故人重。跡共少年疎。唯是閑談興。相逢尙有餘。

卷六十六

律詩 凡一百首

從同州刺史改授太子少傅分司

承華東署三分務。履道西池七過春。歌酒優遊聊卒歲。園林蕭灑可終身。留侯爵秩誠虛貴。疏受生涯未苦貧。月俸百千官二品。朝廷雇我作閑人。

奉和裴令公新成午橋莊綠野堂卽事

舊逕開桃李。新池鑿鳳凰。只添丞相閣。不改午橋莊。遠處塵埃少。閑中日月長。青山爲外屏。綠野是前堂。引水多隨勢。栽松不趁行。年華翫風景。春事看農桑。花妬謝家妓。蘭偷荀令香。遊絲飄酒席。瀑布澗琴床。巢許終身隱。蕭曹到老忙。千年落公使。進退處中央。

自題小草亭

新結一茅茨。規模儉且卑。土階全壘塊。山木半留皮。陰合連藤架。叢香近菊籬。壁宜藜杖倚。門稱荻簾垂。窗裏風清夜。簷間月好時。留連嘗酒客。勾引坐禪師。伴宿雙棲鶴。扶行一侍兒。綠醅量盞飲。紅稻約升炊。齷齪豪家笑。酸寒富屋欺。陶廬閑自愛。顏巷陋誰知。螻蟻謀深穴。鸚鵡占小枝。各隨其分足。焉用有餘爲。

自詠

細故隨緣盡。形衰具體微。鬪閑僧尙鬧。較瘦鶴猶肥。老遣寬裁襪。寒教厚絮衣。馬從銜草馭。雞任啄籠飛。只要天和在。無令物性違。自餘君莫問。何是復何非。

新亭病後獨坐招李侍郎公垂

新亭未有客。竟日獨何爲。趁暖泥茶竈。防寒夾竹籬。頭風初定後。眼暗欲明時。淺把三分酒。閑題數句詩。應須置兩榻。一榻待公垂。

閑臥寄劉同州

軟褥短屏風。昏昏醉臥翁。鼻香茶熟後。腰暖日陽中。伴老琴長在。迎春酒不空。可憐閑氣味。唯欠與君同。殘酌晚飧。

閑傾殘酒後。媛擁小爐時。舞看新翻曲。歌聽自作詞。魚香肥潑火。飯細滑流匙。除却慵餓外。其餘盡不知。喜見劉同州夢得

紫綬白髭鬚。同年二老夫。論心共牢落。見面且歡娛。酒好攜來否。詩多記得無。應須爲春草。五馬少踟蹰。裴令公席上贈別夢得

年老官高多別離。轉難相見轉難思。雪銷酒盡梁王起。便是鄒枚分散時。

尋春題諸家園林

聞健朝朝出。乘春處處尋。天供閑日月。人借好園林。漸以狂爲態。都無悶到心。平生身得所。未省似而今。

又題一絕

貌隨年老欲何如。興遇春牽尚有餘。遙見人家花便入。不論貴賤與親疎。

家園三絕

滄浪峽水子陵灘。路遠江深欲去難。何似家池通小院。臥房階下插魚竿。
籬下先生時得醉。甕間吏部暫偷眠。何如家醞雙魚榼。雪夜花時長在前。
鴛鴦怕捉竟難親。鸚鵡雖籠不著人。何似家禽雙白鶴。閑行一步亦隨身。

老來生計

老來生計君看取。白日遊行夜醉吟。陶令有田唯種秫。鄧家無子不留金。人間榮耀因緣淺。林下幽閑氣味深。煩慮漸銷虛白長。一年心勝一年心。

早春題少室東巖

三十六峯晴。雪銷嵐翠生。月留三夜宿。春引四山行。遠草初含色。寒禽未變聲。東巖最高石。唯有我題名。

早春卽事

眼重朝眠足。頭輕宿酒醒。陽光滿前戶。雪水半中庭。物變隨天氣。春生逐地形。北簷梅晚白。東岸柳先青。
葱壠抽羊角。松巢墮鶴翎。老來詩更拙。吟罷少人聽。

歎春風兼贈李二十侍郎二絕

樹根雪盡催花發。池岸冰銷放草生。唯有鬚霜依舊白。春風於我獨無情。

道場齋戒今初畢。酒伴歡娛久不同。不把一盃來勸我。無情亦得似春風。

春來頻與李二賓客郭外同遊因贈長句

風光引步酒開顏。送老銷春嵩洛間。朝踏落花相伴出。暮隨飛鳥一時還。我爲病叟誠宜退。君是才臣豈合閑。可惜濟時心力在。放教臨水復登山。

二月二日

二月二日新雨晴。草芽菜甲一時生。輕衫細馬春年少。十字津頭一字行。

春和令公綠野堂種花

綠野堂開占物華。路人指道令公家。令公桃李滿天下。何用堂前更種花。

清明日登老君閣望洛城贈韓道士

風光烟火清明日。歌哭悲懽城市間。何事不隨東洛水。誰家又葬北邙山。中橋車馬長無已。下渡舟航亦不閑。塚墓纍纍人擾擾。遼東悵望鶴飛還。

三月三日

畫堂三月初三日。絮撲紗窗鶯拂簾。蓮子數盃嘗冷酒。柘枝一曲試春衫。塔臨池面勝看鏡。戶映花叢當下簾。指點樓南翫新月。玉鈎素手兩纖纖。

雨中聽琴者彈別鶴操

雙鶴分離一何苦。連陰雨夜不堪聞。莫教遷客孀妻聽。嗟歎悲啼詆殺君。

酬鄭二司錄與李六郎中寒食日相遇同宴見贈

偶因令節會嘉賓。况是平生心所親。迎接須矜疏傅老。祇供莫笑阮家貧。盃盤狼藉宜親夜。風景闌珊欲過春。相對喜歡還悵望。同年只有此三人。

喜與楊六侍御同宿

岸幘靜當明月夜。匡牀閑臥落花朝。二三月裏饒春睡。七八年來不早朝。濁水清塵難會合。高鵬低鷁各逍遙。眼看又上青雲去。更卜同衾一兩宵。

殘春詠懷贈楊慕巢侍郎

位逾三品日。年過六旬時。不道官班下。其如筋力衰。猶憐好風景。轉重舊親知。少壯難重得。歡娛且強爲。興來池上酌。醉出袖中詩。靜話開襟久。閑吟放盞遲。落花無限雪。殘髮幾多絲。莫說傷心事。春風酒易悲。

閑居春盡

閑泊池舟靜掩扉。老身慵出客來稀。愁因暮雨留教住。春被殘鶯喚道歸。揭甕偷嘗新熟酒。開箱試著舊生衣。冬裘夏葛相催促。垂老光陰速似飛。

春盡日天津橋醉吟偶呈李尹侍郎

宿雨洗天津。無泥未有塵。初晴迎早夏。落照送殘春。興發詩隨口。狂來酒寄身。水邊行鬼幟。橋上立逡巡。疎傅心情老。吳公政化新。三川徒有主。風景屬閑人。

池上逐涼二首

青苔池上銷殘暑。綠樹陰前逐晚涼。輕屐單衣薄紗帽。淺池平岸庫藤床。簪纓怪我情何薄。泉石諳君味甚長。徧問交親爲老計。多言宜靜不宜忙。窗間睡足休高枕。水畔閑來上小船。棹遣禿頭奴子撥。茶教纖手侍兒煎。門前便是紅塵地。林外無非赤日天。誰信好風清簟上。更無一事但愴然。

香山避暑二絕

六月灘聲如猛雨。香山樓北暢師房。夜深起凭欄干立。滿耳潺湲浚滿面涼。紗巾草履竹疎衣。晚下香山踢翠微。一路涼風十八里。臥乘籃轡睡中歸。

老夫

七八年來遊洛都。三分遊伴二分無。風前月下花園裏。處處唯殘个老夫。世事勞心非富貴。人生實事是歡娛。誰能逐我來閑坐。時共酣歌傾一壺。

香山下卜居

老須爲老計。老計在抽簪。山下初投足。人間久息心。亂藤遮石壁。絕澗護雲林。若要深藏處。無如此處深。無長物。

莫訝家居窄。無嫌活計貧。只緣無長物。始得作閑人。青竹單床簟。烏紗獨幅巾。其餘皆稱是。亦足奉吾身。

宿香山寺酬廣陵牛相公見寄

手札八行詩一篇。無由相見但依然。君匡聖主方行道。我事空王正坐禪。支許徒思遊白月。夔龍未放下

青天應須且爲蒼生住。猶去懸車十四年。

以詩代書寄戶部侍楊郎勸買東鄰王家宅。

勸君買取東鄰宅。與我衡門相並開。雲映嵩峯當戶牖。月和伊水入池臺。林園亦要閒置。筋力應須趁健迴。莫學因循白賓客。欲年六十始歸來。

贈談君

上客清談何聲。幽人閑思自寥寥。請君休說長安事。膝上風清琴正調。

初入香山院對月 大和六年秋作

老住香山初到夜。秋逢白月正圓時。從今便是家山月。試問清光知不知。

題龍門堰西澗

東岸菊叢西岸柳。柳陰烟合菊花開。一條秋水瓊瑤色。闊狹纔容小舫迴。除却悠悠白少傅。何人解入此中來。

秋霖中奉裴令公見招。早出赴會。馬上先寄六韻。

雨暗三秋日。泥深一尺時。老人平旦出。自問欲何之。不是尋醫藥。非干送別離。素書傳好語。絳帳赴佳期。續借桃花馬。崔迎楊柳姬。只愁張錄事。罰我怪來遲。

嘗酒聽歌招客

一甕香醪新插菊。雙鬟小妓薄能謳。管絃漸好新教得。羅綺雖貧免外求。世上貪忙不覺苦。人間除醉卽

須愁。不知此事君知否。君若知時從我遊。

八月三日夜作

露白月微明。天涼景物清。草頭珠顆冷。樓角玉鉤生。氣爽衣裳健。風疎砧杵鳴。夜衾香有思。秋簾冷無情。夢短眠頻覺。宵長起暫行。燭凝臨曉影。蟲怨欲寒聲。槿老花先盡。蓮凋子始成。四時無了日。何用歎衰榮。

病中贈南鄰覓酒

頭痛牙疼三日臥。妻看煎藥婢來扶。今朝似校擡頭語。先問南鄰有酒無。

曉眠後寄楊戶部

軟綾腰褥薄。絲被涼。冷秋天穩暖身。一覺曉眠殊有味。無因寄與早朝人。

秋雨夜眠

涼冷三秋夜。安閑一老翁。臥遲燈滅後。睡美雨聲中。灰宿溫瓶火。香添暖被籠。曉晴寒未起。霜葉滿階紅。

喜夢得自馮翊歸洛兼呈令公

上客新從左輔迴。高陽興助洛陽才。已將四海聲名去。又占三春風景來。甲子等頭鄰共老。文章敵手莫相猜。鄒枚未用爭詩酒。且飲梁王賀喜盃。

齋戒滿夜戲招夢得

紗籠燈下道場前。白日持齋夜坐禪。無復更思身外事。未能全盡世間緣。明朝又擬親盃酒。今夕先聞理管絃。方丈若能來問疾。不妨兼有散花天。

和令公問劉賓客歸來稱意無之作

水南秋一半。風景未蕭條。皂蓋迴沙苑。籃轡上洛橋。閑嘗黃菊酒。醉唱紫芝謠。稱意那勞問。請錢不早朝。

酬夢得窮秋夜坐卽事見寄

焰細燈將盡。聲遙漏正長。老人秋向火。小女夜縫裳。菊悴籬經雨。萍銷水得霜。今冬暖寒酒。先擬共君嘗。

偶於維陽牛相公處覓得箏。箏未到。先寄詩來。走筆戲答。

楚匠饒巧思。秦箏多好音。如能惠一面。何啻直雙金。玉柱調須品。朱絃染要深。會教魔女弄。不動是禪心。

答夢得秋庭獨坐見贈

林梢隱映夕陽殘。庭際蕭疎夜氣寒。霜草欲枯虫思急。風枝未定鳥棲難。容衰見鏡同惆悵。身健逢盃且

喜歡。應是天教相煖熱。一時垂老與閑官。

長齋月滿。攜酒先與夢得對酌。醉中同赴令公之宴。戲贈夢得。

齋宮前日滿三旬。酒榼今朝一拂塵。乘興還同訪戴客。解醒仍對姓劉人。病心湯沃寒灰活。老面花生朽

木春。若怕平原怪先醉。知君未慣吐車茵。

奉酬淮南牛相公思黯見寄二十四韻

白老忘機客。牛公濟世賢。鷗棲心戀水。鵬舉翅摩天。累就優閑秩。連操造化權。貧司甚蕭灑。榮路自喧闐。望苑三千日。台階十五年。是人皆企望。何物不陶甄。籃輿遊嵩嶺。油幢鎮海壖。竹篙撐釣艇。金甲擁樓船。雪夜尋僧舍。春朝列妓筵。長齋儼香火。密宴簇花鈿。自覺閑勝鬧。遙知醉笑禪。是非分未定。會合杳無緣。

我正思楊府。君應望洛川。西來風嫋嫋。南去鴈連連。日落龍門外。潮生瓜步前。秋同一時盡。月共兩鄉圓。舊眷交歡在。新文氣調全。慚無白雪曲。難答碧雲篇。金谷詩誰賞。蕪城賦衆傳。珠應晒魚目。鉛未伏龍泉。遠計驚魔物。深情寄酒錢。霜紈一百疋。玉柱十三絃。楚醴來樽裏。秦聲送耳邊。何時紅燭下。相對一陶然。

吳祕監每有美酒。獨酌獨醉。但蒙詩報。不以飲招。輒此戲酬。兼呈夢得。

逢山仙客下烟霄。對酒唯吟獨酌謠。不怕道狂揮玉爵。亦曾乘興換金貂。君稱名士誇能飲。我是愚夫肯見招。賴有伯倫爲醉伴。何愁不解傲松喬。

酬夢得霜夜對月見懷

淒清冬夜景。搖落長年情。月帶新霜色。碣和遠鴈聲。暖憐爐火近。寒覺袂衣輕。枕上酬佳句。詩成夢不成。

初冬月夜得皇甫澤州手札并詩數篇因遣報書偶題長句

清冷玉韻兩三章。落泊銀鈎七八行。心逐報書懸鴈足。夢尋來路遶羊腸。水南地空多明月。山北天寒足早霜。最恨潑醅新熟酒。迎冬不得共君嘗。

雪中酒熟欲攜訪吳監先寄此詩

新雪對新酒。憶同傾一盃。自然須訪戴。不必待延枚。陳榻無辭解。袁門莫懶開。笙歌與談笑。隨事自將來。

酬令公雪中見贈訝不與夢得同相訪

雪似鵝毛飛散亂。人被鶴氅立徘徊。鄒生枚叟非無興。唯待梁王召卽來。

題酒甕呈夢得

若無清酒兩三甕。爭向白鬚千萬莖。麴蘖銷愁真得力。光陰催老苦無情。凌烟閣上功無分。伏火爐中藥未成。更擬共君何處去。且來同作醉先生。

迂叟

一辭魏闕就商賓。散地閑居八九春。初時被目爲迂叟。近日蒙呼作隱人。冷暖俗情諳世路。是非閑論任交親。應須繩墨機關外。安置疎愚鈍滯身。

洛下閑居寄山南令狐相公

已收身向園林下。猶寄名於祿仕間。不鍛嵇康彌懶靜。無金疏傅更貧閑。支分門內餘生計。謝絕朝中舊往還。唯是相君忘未得。時思漢水夢巴山。

惜春贈李尹

春色有時盡。公門終日忙。兩衙但不闕。一醉亦何妨。芳樹花團雪。衰翁鬢撲霜。知君倚年少。未苦惜風光。對酒勸令公。開春遊宴。

時泰歲豐無事日。功成名遂自由身。前頭更有忘憂日。向上應無快活人。自去年來多事故。從今日去少交親。宜須數數謀歡會。好作開成第二春。

與夢得偶同到敦詩宅感而題壁

山東纔副蒼生願。川上俄驚逝水波。履道淒涼新第宅。宣城零落舊笙歌。園荒唯有薪堪採。門冷兼無雀可羅。今日相逢偶同到。傷心不是故經過。

楊六尚書新授東川節度使代妻戲賀兄嫂二絕

劉綱與婦共升仙。弄玉隨夫亦上天。何似沙哥領崔嫂。碧油幢引向東川。
金花銀碗饒君用。卷畫羅衣盡嫂裁。覓得黔婁爲妹婿。可能空寄蜀茶來。

閑遊卽事

郊野遊行熟。村園次第過。驀山尋澗澗。踏水渡伊河。寒食青青草。春風瑟瑟波。逢人共盃酒。隨馬有笙歌。
勝事經非少。芳辰過亦多。還須自知分。不老擬如何。

六十六

七十欠四歲。此生那足論。每因悲物故。還且喜身存。安得頭長黑。爭教眼不昏。交遊成拱木。婢僕見曾孫。
瘦覺腰金重。衰憐鬢雪繁。將何理老病。應付與空門。

池上早春卽事招夢得

老更驚年改。閑先覺日長。晴薰榆莢黑。春染柳梢黃。雪破山呈色。冰融水放光。低平穩船舫。輕暖好衣裳。
白角三升榼。紅茵六尺牀。偶遊難得伴。獨醉不成狂。我有中心樂。君無外事忙。經過莫慵懶。相去兩三坊。
因夢得題公垂所寄蠟燭因寄公垂

照梁初日光相似。出水新蓮豔不如。却寄兩條君領取。明年雙引入中書。

令公南莊花柳正盛欲偷一賞先寄二篇

最憶樓花千萬朵。偏憐堤柳兩三株。擬提社酒攜村妓。擅入朱門莫怪無。

可惜亭臺閑度日。欲偷風景暫遊春。只愁花裏鶯饒舌。飛入宮城報主人。

春夜宴席上戲贈裴淄州

九十不衰真地仙。六旬猶健亦天憐。今年相遇鶯花月。此夜同歡歌酒筵。四座齊聲和絲竹。兩家隨分闋金鈿。留君到曉無他意。圖向君前作少年。

贈夢得

年顏老少與君同。眼未全昏耳未聾。放醉臥爲春日伴。趁歡行入少年叢。尋花借馬煩川守。弄水偷船惱令公。聞道洛城人盡怪。呼爲劉白二狂翁。

晚春欲攜酒尋沈四著作。先以六韻寄之。

病容衰慘澹。芳景晚蹉跎。無計留春得。爭能奈老何。篇章慵報答。杯讌喜經過。顧我酒狂久。負君詩債多。敢辭攜綠蟻。只願見青娥。最憶陽關唱。真珠一串歌。

開成二年三月三日。河南尹李待價以人和歲稔。將禊於洛濱。前一日。啓留守裴令公。公明日召太子少傅白居易。太子賓客蕭籍。李仍叔。劉禹錫。前中書舍人鄭居中。國子司業裴暉。河南少尹李道樞。倉部郎中崔晉。司封員外郎張可續。駕部員外郎盧言。虞部員外郎苗愔。和州刺史裴儔。淄州刺史裴洽。檢校禮部員外郎楊魯士。四門博士談弘謨等一十五人。合宴于舟中。由斗亭歷魏堤。抵津橋。登臨沂沿。自晨及暮。簪組交映。歌笑間發。前水嬉而後妓樂。左筆硯而右壺觴。望之若仙。觀者如堵。盡風光之寶。極遊泛之娛。美景良辰。賞心樂事。盡得於今日矣。若不記錄。謂洛無

人。晉公首賦一章。鏗然玉振。顧謂四座繼而和之。居易舉酒抽毫。奉十二韻以獻。

三月草萋萋。黃鶯歇又啼。柳橋晴有絮。沙路潤無泥。禊事修初畢。遊人到欲齊。金鈿耀桃李。絲管駭鳧鷖。轉岸迴船尾。臨流簇馬蹄。鬧翻楊子渡。踏破魏王堤。妓接謝公宴。詩陪荀令題。舟同李鷹汎。醴爲穆生攜。水引春心蕩。花牽醉眼迷。塵街從鼓動。烟樹任鴉棲。舞急紅腰軟。歌遲翠黛低。夜歸何用燭。新月鳳樓西。

同夢得寄賀東西川二楊尙書

龍節對持真可愛。鴈行相接更堪誇。兩川風景同三月。千里江山屬一家。魯衛定知聯氣色。潘揚亦覺有光華。應憐洛下分司伴。冷宴閑遊老看花。

喜小樓西新柳抽條

一行弱柳前年種。數尺柔條今日新。漸欲拂他騎馬客。未多遮得上樓人。須教碧玉羞眉黛。莫與紅桃作麴塵。爲報金堤千萬樹。饒伊未敢苦爭春。

晚春酒醒尋夢得

料合同惆悵。花殘酒亦殘。醉心忘老易。醒眼別春難。獨出雖慵懶。相逢定喜懽。還攜小蠻去。誠覓老劉看。

感事

服氣崔常侍。燒丹鄭舍人。常期生羽翼。那忽化灰塵。每遇淒涼事。還思潦倒身。唯知趁盃酒。不解鍊金銀。睡適三尸性。慵安五藏神。無憂亦無喜。六十六年春。

和裴令公南莊一絕

陶唐僻陋那堪比。謝墅幽微不足攀。何似嵩峯三十六。長隨申甫作家山。
宅西有流水。牆下構小樓。臨翫之時。頗有幽趣。因命歌酒。聊以自娛。獨醉獨吟。偶題五絕。
伊水分來不自由。無人解愛爲誰流。家家拋向牆根底。唯我栽蓮起小樓。
水色波文何所似。麴塵羅帶一條斜。莫言羅帶春無主。自置樓來屬白家。
日灑水光搖素壁。風飄樹影拂朱欄。皆言此處宜絃管。試奏霓裳一曲看。
霓裳奏罷唱梁州。紅袖斜翻翠黛愁。應是遙聞勝近聽。行人欲過盡迴頭。
獨醉還須得歌舞。自娛何必要親賓。當時一部清商樂。亦不長將樂外人。

偶作

籃舁出卽忘歸舍。柴戶昏猶未掩關。聞客病時慚體健。見人忙處覺身閑。清涼秋寺行香去。和煖春城拜表還。木雁一篇須記取。致身才與不才間。

同夢得酬牛相公初到洛中小飲見贈

淮南揮手拋紅旆。洛下迴頭向白雲。政事堂中老丞相。制科場裏舊將軍。宮城烟月饒全占。關塞風光請中分。詩酒放狂猶得在。莫欺白叟與劉君。

幽居早秋閑詠

岸僻翳塵外。清涼水木間。臥風秋拂簟。步月夜開關。且得身安泰。從他世險艱。但休爭要路。不必入深山。軒鶴留何用。泉魚放不還。誰人知此味。臨老十年間。

和令狐僕射小飲聽阮咸

掩抑復淒清。非琴不是箏。還彈樂府曲。別佔阮家名。古調何人識。初聞滿座驚。落盤珠歷歷。搖珮玉琤琤。似勸盃中物。如含林下情。時移音律改。豈是昔時聲。

燒藥不成命酒獨醉

白髮逢秋短。丹砂見火空。不能留姹女。爭免作衰翁。賴有盃中綠。能爲面上紅。少年心不遠。只在半酣中。

送盧郎中赴河東裴令公幕

別時暮雨洛橋岸。到日涼風汾水波。荀令見君應問我。爲言秋草閉門多。

送李滁州

君於覺路深留意。我亦禪門薄致功。未悟病時須去病。已知空後莫依空。白衣臥疾嵩山下。皂蓋行春楚水東。誰道三年千里別。兩心同在道場中。

長齋月滿寄思黯

一日不見如三月。一月相思如七年。似隔山河千里地。仍當風雨九秋天。明朝齋滿相尋去。擊榼抱衾同醉眠。

冬夜對酒寄皇甫十

霜殺中庭草。冰生後院池。有風空動樹。無葉可辭枝。十月苦長夜。百年強半時。新開一瓶酒。那得不相思。

歲除夜對酒

哀翁歲除夜對酒思悠然。草白經霜地。雲黃欲雪天。醉依香枕坐。慵傍暖爐眠。洛下閑來久。明朝是十年。

卷六十七

律詩 凡七十五首

司徒令公分守東洛。移鎮北都。一心勤王。三月成政。形容盛德。實在歌詩。况辱知音。敢不先唱。輒奉五言四十韻寄獻。以抒下情。

天上中台正。人間一品高。休明值堯舜。勳業過蕭曹。始擅文三捷。終兼武六韜。動人名赫赫。憂國意忉忉。盪蔡擒封豕。平齊斬巨鼈。兩河收土宇。四海定波濤。寵重移宮籥。恩新換闔旄。保釐東宅靜。守護北門牢。晉國封疆闊。并州士馬豪。胡兵驚赤幟。邊鴈避烏號。令下流如水。仁霑澤似膏。路喧歌五袴。軍醉感單醪。將校森貔虎。賓僚儼雋髦。客無煩夜柝。吏不犯秋毫。神在臺駟助。魂亡獫狁逃。德星銷彗孛。霖雨洗腥臊。烽戍高臨代。關河遠控洮。汾雲晴漠漠。朔吹冷飈飈。豹尾交銜戟。蚪鬚捧佩刀。通天白犀帶。照地紫麟袍。羌管吹楊柳。燕姬酌蒲萄。銀含鑿落盞。金屑琵琶槽。遙想從軍樂。應忘報國勞。紫微留北闕。綠野寄東臯。忽憶前時會。多慚下客叨。清宵陪讌話。美景從遊遨。花月還同賞。琴詩雅自操。朱絃拂宮徵。洪筆振風騷。近竹開方丈。依林架桔槔。春池八九曲。畫舫兩三舸。逕滑苔粘屐。潭深水沒篙。綠絲縈岸柳。紅粉映樓桃。爲穆光陳醴。招劉共籍糟。舞鸞金翡翠。歌頸玉螭螭。盛德終難遇。明時豈易遭。公雖慕張范。帝未捨伊臯。眷戀心方結。踟躕首已搔。鸞鳳上寥廓。燕雀住蓬蒿。欲獻文狂簡。徒煩思鬱陶。可憐四百字。輕重抵鴻毛。

和東川楊慕巢尚書府中獨坐感戚在懷見寄十四韻

我是知君者。君今意若何。窮通時不定。苦樂事相和。東蜀歡殊渥。西江歎逝波。只緣榮貴極。翻使感傷多。行斷風驚雁。年侵日下坡。片心休慘戚。雙鬢已蹉跎。紫綬黃金印。青幢白玉珂。老將榮補帖。愁用道銷磨。外府饒盃酒。中堂有綺羅。應須引滿飲。何不放狂歌。縣水通巴峽。香山對洛河。將軍馳鐵馬。少傅步銅駝。深契憐松竹。高情憶薜蘿。懸車年甚遠。未敢故相過。

分司洛中多暇。數與諸客宴遊。醉後狂吟。偶成十韻。因招夢得賓客。兼呈思黯奇章公。

性與時相遠。身將世兩忘。寄名朝士籍。寓興少年場。老豈無談笑。貧猶有酒漿。隨時求伴侶。逐日用風光。數數遊何爽。些些病未妨。大教榮啓樂。人恕接輿狂。改業爲逋客。移家住醉鄉。不論招夢得。兼擬誘奇章。要路風波險。權門市井忙。世間無可戀。不是不思量。

小歲日喜談氏外孫女孩滿月

今日夫妻喜。他人豈得知。自嗟生女晚。敢訝見孫遲。物以稀爲貴。情因老更慈。新年逢吉日。滿月乞名時。桂燎熏花果。蘭湯洗玉肌。懷中有可抱。何必是男兒。

閑吟贈皇甫郎中親家翁

誰能嗟歎光陰暮。豈復憂愁活計貧。忽忽不知頭上事。時時猶憶眼中人。早爲良友非交勢。晚接嘉姻不失親。最喜兩家婚嫁畢。一時抽得尙平身。

夢得臥病攜酒相尋先以此寄

病來知少客。誰可以爲娛。日晏開門未。秋寒有酒無。自宜相慰問。何必待招呼。小疾無妨飲。還須挈一壺。
酬思黯戲贈

鍾乳三千兩。金釵十二行。妬他心似火。欺我鬢如霜。慰老資歌笑。銷愁仰酒漿。眼看狂不得。狂得且須狂。
又戲答絕句

狂夫與我世相忘。故態些些亦不妨。縱酒放歌聊自樂。接輿爭解教人狂。

令狐相公與夢得交情素深。眷予分亦不淺。一聞薨逝。相顧泫然。旋有使來。得前月未歿之前數日書及詩寄贈。夢得哀吟悲歎。寄情於詩。詩成示予。感而繼和。

緘題重疊語殷勤。存歿交親自此分。前月使來猶理命。今朝詩到是遺文。銀鈎見晚書無報。玉樹埋深哭不聞。最感一行絕筆字。尙言千萬樂天君。

洛下雪中頻與劉李二賓客宴集。因寄汴州李尙書。

水南水北雪紛紛。雪裏歡遊莫厭頻。日日暗來唯老病。年年少去是交親。碧氈帳暖梅花溼。紅燎爐香竹葉春。今日鄒枚俱在洛。梁園置酒召何人。

看夢得題答李侍郎詩。詩中有文星之句。因戲和之。

看題錦繡報瓊瓊。俱是人天第一才。好遣文星守躔次。亦須防有客星來。

閑適

祿俸優饒官不卑。就中閑適是分司。風光暖助遊行處。雨雪寒供飲宴時。肥馬輕裘還且有。羸歌薄酒亦

相隨。微躬所要今皆得。只是蹉跎得校遲。

戲答思黯

何時得見十三絃。待取無雲有月天。願得金波明似鏡。鏡中照出月中仙。

酬裴令公贈馬相戲

安石風流無奈何。欲將赤驥換青娥。不辭便送東山去。臨老何人與唱歌。

新歲贈夢得

暮齒忽將及。同心私自鄰。漸衰宜減食。已喜更加年。紫綬行聯袂。籃輿出比肩。與君同甲子。歲酒合誰先。

早春持齋答皇甫十見贈

正月晴和風景新。紛紛已有醉遊人。帝城花笑長齋客。二十年來負早春。

戲贈夢得兼呈思黯

雙鬢莫欺今老矣。一盃莫笑便陶然。陳郎中處爲高戶。裴使君前作少年。顧我獨狂多自哂。與君同病最相憐。月終齋滿誰開素。須詎奇章置一筵。

早春憶遊思黯南莊因寄長句

南莊勝處心常憶。借問軒車早晚遊。美景難忘竹廊下。好風爭柰柳橋頭。冰消見水多於地。雪霽看山盡入樓。若待春深始同賞。鶯殘花落却堪愁。

酬皇甫十早春對雪見贈

漠漠復雰雰。東風散玉塵。明催竹窗曉。寒退柳園春。綠醕香堪憶。紅爐暖可親。忍心三兩日。莫作破齋人。
奉和思黯自題南莊見示兼呈夢得

謝家別墅最新奇。山展屏風花夾籬。曉月漸沈橋脚底。晨光初照屋梁時。臺頭有酒鶯呼客。水面無塵風洗池。除却吟詩兩閑客。此中情狀更誰知。

送蘄春李十九使君赴郡

可憐官職好文詞。五十專城未是遲。曉日鏡前無白髮。春風門外有紅旗。郡中何處堪攜酒。席上誰人解和詩。唯共交親開口笑。知君不及洛陽時。

自題酒庫

野鶴一辭籠。虛舟長任風。送愁還闕處。移老入閑中。身更求何事。天將富此翁。此翁何處富。酒庫不曾空。
寒食日寄楊東川

不知楊六逢寒食。作底歡娛過此辰。兜率寺高宜望月。嘉陵江近好遊春。蠻旗似火行隨馬。蜀妓如花坐遶身。不使黔婁夫婦看。誇張富貴向何人。

醉後聽唱桂華曲

桂華詞意苦丁寧。唱到常娥醉便醒。此是世間腸斷曲。莫教不得意人聽。

酬夢得以子五月長齋延僧徒絕賓友見戲十韻

賓客懶逢迎。條然池館清。簷間空燕語。林靜未蟬鳴。葷血還休食。盃觴亦罷傾。三春多放逸。五月暫修行。

香印朝烟細。紗燈夕焰明。交遊諸長老。師事古先生。禪後心彌寂。齋來體更輕。不唯忘肉味。兼擬減風情。蒙以聲聞待。難將戲論爭。虛空若有佛。靈運恐先成。

奉和裴令公三月上巳日遊大原龍泉憶去歲禳洛見示之作

去歲暮春上巳。共泛洛水中流。今歲暮春上巳。獨立香山下頭。風光閑寂寂。旌旆遠悠悠。丞相府歸晉國。太行山礙并州。鵬背負天龜曳尾。雲泥不可得同遊。

又和令公新開龍泉晉水二池

舊有潢汚泊。今爲白水塘。笙歌開四面。樓閣在中央。春變烟波色。晴添樹木光。龍泉信爲美。莫忘午橋莊。早夏曉興贈夢得

窗明簾薄透朝光。臥整巾簪起下牀。背壁燈殘經宿焰。開箱衣帶隔年香。無情亦任他春去。不醉爭銷得日長。一部清商一壺酒。與君明日暖新堂。

春日題乾元寺上方最高峯亭

危亭絕頂四無鄰。見盡三千世界春。但覺虛空無障礙。不知高下幾由旬。迴看官路三條線。却望都城一片塵。賓客暫遊無半日。王侯不到便終身。始知天造空閑境。不爲奔忙富貴人。

奉和思黯相公以李蘇州所寄太湖石奇狀絕倫因題二十韻見示兼呈夢得

錯落復崔嵬。蒼然玉一堆。峯駢仙掌出。罅坼劍門開。峭頂高危矣。盤根下壯哉。精神欺竹樹。氣色壓亭臺。隱起磷磷狀。凝成瑟瑟胚。廉稜露鋒刃。清越扣瓊瑰。岌嶮形將動。巍峨勢欲摧。奇應潛鬼怪。靈合蓄雲雷。

黛潤霑新雨。班明點古苔。未曾棲鳥雀。不肯染塵埃。尖削琅玕筍。窪剝馬瑙壘。海神移碣石。畫障覆天台。在世爲尤物。如人負逸才。渡江一葦載。入洛五丁推。出處雖無意。升沉亦有媒。拔從水府底。置向相庭隈。對稱吟詩句。看宜把酒盃。終隨金礪用。不學玉山頹。疏傳心偏愛。園公眼屢迴。共嗟無此分。虛管太湖來。

奉和思黯相公雨後林園四韻見示

新晴夏景好。復此池邊地。烟樹綠含滋。水風清有味。便成林下隱。都望門前事。騎吏引歸軒。始知身富貴。

晚夏閑居絕無賓客欲尋夢得先寄此詩

魚笱朝殮飽。蕉紗暑服輕。欲爲牕下寢。先傍水邊行。晴引鶴雙舞。秋生蟬一聲。無人解相訪。有酒共誰傾。老更諳時事。閑多見物情。只應劉與白。二叟自相迎。

寄李蘄州

下車書奏龔黃課。動筆詩傳鮑謝風。江郡謳謠誇杜母。洛城歡會憶車公。笛愁春盡梅花裏。簾冷秋生薤葉中。不道蘄州歌酒少。使君難稱與誰同。

憶江南詞三首

江南好。風景舊曾諳。日出江花紅勝火。春來江水綠如藍。能不憶江南。
江南憶。最憶是杭州。山寺月中尋桂子。郡亭枕上看潮頭。何日更重遊。
江南憶。其次憶吳宮。吳酒一盃春竹葉。吳娃雙舞醉芙蓉。早晚復相逢。

酬思黯相公晚夏雨後感秋見贈

暮去朝來無歇期。炎涼暗向雨中移。夜長祇合愁人覺。秋冷先應瘦客知。兩幅彩牋揮逸翰。一聲寒玉振清辭。無憂無病身榮貴。何故沈吟亦感時。

久雨閑悶對酒偶吟

淒淒苦雨暗銅駝。嫋嫋涼風起漕河。自夏及秋晴日少。從朝至暮悶時多。鷺臨池立窺魚笱。隼傍林飛拂雀羅。賴有盃中神聖物。百憂無奈十分何。

雨後秋涼

夜來秋雨後。秋氣颯然新。團扇先辭手。生衣不著身。更添砧引思。難與簾相親。此境誰偏覺。貧閑老瘦人。酬夢得早秋夜對月見寄

吾衰寡情趣。君病懶經過。其柰西樓上。新秋明月何。庭蕪凝白露。池色澹金波。況是初長夜。東城砧杵多。題謝公東山障子

賢愚共在浮生內。貴賤同趨羣動間。多見忙時已衰病。少聞健日肯休閒。鷹飢受縛從難退。鶴老乘軒亦不還。唯有風流謝安石。拂衣攜妓入東山。

謝楊東川寄衣服

年年衰老交遊少。處處蕭條書信稀。唯有巢兄不相忘。春茶未斷寄秋衣。

詠懷寄皇甫朗之

老大多情足往還。招僧待客夜開關。學調氣後衰中健。不用心來鬧處閑。養病未能辭薄俸。忘名何必入

深山與君別有相知分。同置身於木雁間。

東城晚歸

一條邛杖懸龜榼。雙角吳童控馬銜。晚入東城誰識我。短靴低帽白蕉衫。

與夢得沽酒閑飲且約後期

少時猶不憂生計。老後誰能惜酒錢。共把十千沽一斗。相看七十欠三年。徵閑稚子窮經史。醉聽清吟勝管絃。更待菊黃家醞熟。共君一醉一陶然。

與牛家妓樂雨夜合宴

玉管清絃聲旖旎。翠釵紅袖坐參差。兩家合奏洞房夜。八月連陰秋雨時。歌臉有情凝睇久。舞腰無力轉裙遲。人間歡樂無過此。上界西方卽不知。

和楊六尚書喜兩弟漢公轉吳興魯士賜章服命賓開宴用慶恩榮賦長句見示

華筵賀客日紛紛。劍外歡娛洛下聞。朱紱寵光新照地。彤襜喜氣遠凌雲。榮聯花萼詩難和。樂助埴篴酒易醺。感羨料應知我意。今生此事不如君。

自詠

鬢白面微紅。醺醺半醉中。百年隨手過。萬事轉頭空。臥疾瘦居士。行歌狂老翁。仍聞好事者。將我畫屏風。夢得相過。援琴命酒。因彈秋思。偶詠所懷。兼寄繼之待價二相府。

閑居靜侶偶相招。小飲初酣琴欲調。我正風前弄秋思。君應天上聽雲韶。時和始見陶鈞力。物遂方知盛

聖朝雙鳳栖梧魚在藻。飛沉隨分各逍遙。

九月八日酬皇甫十見贈

君方對酒綴詩章。我正持齋坐道場。處處追遊雖不去。時時吟詠亦無妨。霜蓬舊鬢三分白。露菊新花一半黃。惆悵東籬不同醉。陶家明日是重陽。

慕巢尚書書云。室人欲爲買置一歌者。非所安也。以詩相報。因而和之。

東川已過二三春。南國須求一兩人。富貴大都多老大。歡娛太半爲親賓。如愁翠黛應堪重。買笑黃金莫訴貧。他日相逢一盃酒。樽前還要落梁塵。

杪秋獨夜

無限少年非我伴。可憐清夜與誰同。歡娛牢落中心少。親故凋零四面空。紅葉樹飄風起後。白鬚人立月明中。前頭更有蕭條物。老菊衰蘭三兩叢。

憑李睦州訪徐凝山人

郡守輕詩客。鄉人薄釣翁。解憐徐處士。唯有李郎中。

蘇州故吏

江南故吏別來久。今日池邊識我無。不獨使君頭似雪。華亭鶴死白蓮枯。得揚湖州書。頗誇撫民接賓。縱酒題詩。因以絕句戲之。

豈獨愛民兼愛客。不唯能飲又能文。白蘋洲上春傳語。柳使君輸楊使君。

天宮閣秋晴晚望

洛城秋霽後。梵閣暮登時。此日風煙好。今秋節候遲。霞光紅泛灩。樹影碧參差。莫慮言歸晚。牛家有宿期。

酬夢得暮秋晴夜對月相憶

霽月光如練。盈庭復滿池。秋深無熱後。夜淺未寒時。露葉團荒菊。風枝落病梨。相思懶相訪。應是各年衰。

同夢得和思黯見贈來詩中先敍三人同讌之歡次有歎髮漸衰嫌孫子催老之意因酬妍唱兼吟鄙懷

醉伴騰騰白與劉。何朝何夕不同遊。留連燈下明猶飲。斷送樽前倒卽休。催老莫嫌孫稚長。加年須喜鬢毛秋。教他伯道爭存活。無子無孫亦白頭。

聽歌

管妙絃清歌入雲。老人合眼醉醺醺。誠知不及當年聽。猶覺聞時勝不聞。

三年冬隨事鋪設小堂寢處稍似穩暖因念衰病偶吟所懷

小宅非全陋。中堂不甚卑。聊堪會親族。足以貯妻兒。煖帳迎冬設。溫爐向夜施。裘新青兔褐。褥軟白猿皮。似鹿眠深草。如雞宿穩枝。逐身安枕席。隨事有屏帷。病致衰殘早。貧營活計遲。由來蠶老後。方是繭成時。

初冬卽事呈夢得

青氈帳煖喜微雪。紅地爐深宜早寒。走筆小詩能和否。潑醅新酒試嘗看。僧來乞食因留宿。客到開樽便共歡。臨老交親零落盡。希君恕我取人寬。

自罷河南已換七尹。每一入府。悵然舊遊。因宿內廳。偶題西壁。兼呈韋尹常侍并贈張處士韋山人。

羅襟蕙帶竹皮巾。雖到塵中不染塵。每見俗人多慘澹。唯逢美酒卽殷勤。浮雲心事誰能會。老鶴風標不可親。世說三生如不謬。共疑巢許是前身。

天寒晚起引酌詠懷寄許州王尚書汝州李常侍。

葉覆冰池雪滿山。日高慵起未開關。寒來更亦無過醉。老後何由可得閑。四海故交唯許汝。十年貧健是樊蠻。相思莫忘櫻桃會。一放狂歌一破顏。

四年春

柳梢黃嫩草芽新。又入開成第四春。近日放慵多不出。少年嫌老可相親。分司吉傅頻過舍。致仕崔卿擬卜鄰。時輩推遷年事到。往還多是白頭人。

白髮

白髮生來三十年。而今鬢髮盡皤然。歌吟終日如狂叟。衰疾多時似瘦仙。八戒夜持香火印。三元朝念藥珠篇。其餘便被春收拾。不作閑遊卽醉眠。

追歡偶作

追歡逐樂少閑時。補帖平生得事遲。何處花開曾後看。誰家酒熟不先知。石樓月下吹蘆管。金谷風前舞柳枝。十聽春啼變鶯舌。三嫌老醜換蛾眉。樂天一過難知分。猶自咨嗟兩鬢絲。

公垂尙書以白馬見寄。光潔穩善。以詩謝之。
翩翩白馬稱金羈。領綴銀花尾曳絲。毛色鮮明人盡愛。性靈馴善主偏知。免將妾換慚來處。試使奴牽欲上時。不蹶不驚行步穩。最宜山簡醉中騎。

西樓獨立

身著白衣頭似雪。時時醉立小樓中。路人迴顧應相怪。十一年來見此翁。

書事詠懷

官俸將生計。雖貧豈敢嫌。金多輸陸賈。酒起勝陶潛。牀暖僧敷坐。樓晴妓卷簾。日遭齋破用。春賴閨加添。老向歡爛切。狂於飲不廉。十年閑未足。亦恐涉無厭。

酬夢得比萱草見贈

杜康能散悶。萱草解忘憂。借問萱逢杜。何如白見劉。老衰勝少夭。閑樂笑忙愁。試問同年內。何人得白頭。

問皇甫十

苦樂心由我。窮通命任他。坐傾張翰酒。行唱接輿歌。榮盛傍看好。優閑自適多。知君能斷事。勝負兩如何。

早春獨登天宮閣

天宮日暖閣門開。獨上迎春飲一盃。無限遊人遙怪我。緣何最老最先來。

送蘇州李使君赴郡二絕句

憶拋印綬辭吳郡。衰病當時已有餘。今日賀君兼自喜。八迴看換舊銅魚。

館娃宮深春日長。烏鵲橋高秋夜涼。風月不知人世變。奉君直似奉吳王。

長洲曲新詞

茂苑綺羅佳麗地。女湖桃李豔陽時。心奴已死胡容老。後輩風流是阿誰。

卷六十八

律詩 一百首

病中詩十五首 并序

開成已未歲。余蒲柳之年。六十有八。冬十月甲寅。且始得風痺之疾。體癯目眩。左足不支。蓋老病相乘。時而至耳。余早棲心釋梵。浪跡老莊。因疾觀身。果有所得。何則。外形骸而內忘憂患。先禪觀而後順醫治。旬月以還。厥疾少閒。杜門高枕。澹然安閑。吟諷興來。亦不能遏。因成十五首。題爲病中詩。且貽所知。兼用自廣。昔劉公幹病漳浦。謝康樂臥臨川。咸有篇章。抒詠其志。今引而序之者。慮不知我者。或加誚焉。

初病風

六十八衰翁。乘衰百疾攻。朽株難免蠹。空穴易來風。肘痺宜生柳。頭旋劇轉蓬。恬然不動處。虛白在胸中。

枕上作

風疾侵凌臨老頭。血凝筋滯不調柔。甘從此後支離臥。賴是從前爛熳遊。迴思往事紛如夢。轉覺餘生杳若浮。浩氣自能充靜室。驚飈何必蕩虛舟。腹空先進松花酒。膝冷重裝桂布裘。若問樂天憂病否。樂天知

命了無憂。

答閑上人來問因何風疾

一牀方丈向陽開。勞動文殊問疾來。欲界凡夫何足道。四禪天始免風災。

病中五絕

世間生老病相隨。此事心中久自知。今日行年將七十。猶須慚愧病來遲。
方寸成灰鬢作絲。假如強健亦何爲。家無憂累身無事。正是安閑好病時。
李君墓上松應拱。元相池頭竹盡枯。多幸樂天今始病。不知合要苦治無。
目昏思寢卽安眠。足軟妨行便坐禪。身作醫王心是藥。不勞和扁到門前。
交親不要苦相憂。亦擬時時強出遊。但有心情何用脚。陸乘肩輿水乘舟。

送嵩客

登山臨水分無期。泉石烟霞今屬誰。君到嵩陽吟此句。與教三十六峯知。

罷灸

病身佛說將何喻。變滅須臾豈不開。莫遣淨名知我笑。休將火艾灸浮雲。

賣駱馬

五年花下醉騎行。臨賣迴頭嘶一聲。項藉顧驢猶解歎。樂天別駱豈無情。

別柳枝

兩枝楊柳小樓中。嫋娜多年伴醉翁。明日放歸歸去後。世間應不要春風。

就煖偶酌戲諸詩酒舊侶

低屏軟褥臥藤牀。鼻向前軒就日陽。一足任他爲外物。三盃自要沃中腸。頭風若見詩應愈。齒折仍誇笑不妨。細酌徐吟猶得在。舊遊未必便相忘。

歲暮呈思黯相公皇甫朗之及夢得尙書

歲暮皤然一老夫。十分流輩九分無。莫嫌身病人扶侍。猶勝無身可遣扶。

自解

房傅往世爲禪客。王道前生應畫師。我亦定中觀宿命。多生債負是歌詩。不然何故狂吟詠。病後多於未病時。

歲暮病懷贈夢得

十年四海故交親。零落唯殘兩病身。共遣數奇從是命。同教步蹇有何因。眼隨老減嫌長夜。體待陽舒望早春。新樂堂前舊池上。相過亦不要他人。

雪後過集賢裴令公舊宅有感

梁王損館後。枚叟過門時。有淚人還泣。無情雪不知。臺亭留盡在。賓客散何之。唯有蕭條鴈。時來下故池。

酬夢得貧居詠懷見贈

歲陰生計兩蹉跎。相顧悠悠醉且歌。廚冷難留烏止屋。門閑可與雀張羅。病添莊鳥吟聲苦。貧欠韓康藥

債多日望揮金賀新命。俸錢依舊又如何。

酬夢得見喜疾瘳

暖臥摩絛褥。寒傾藥酒螺。昏昏布裘底。病醉睡相和。末疾徒云爾。餘年有幾何。須知差與否。相去校無多。

夜聞箏中彈瀟湘送神曲感舊

縹緲巫山女。歸來七八年。殷勤湘水曲。留在十三絃。苦調吟還出。深情咽不傳。萬重雲水思。今夜月明前。

感蘇州舊舫

畫梁朽折紅窗破。獨立池邊盡日看。守得蘇州船舫爛。此身爭合不衰殘。

感舊石上字

閑撥船行尋舊池。幽情往事復誰知。太湖石上鐫三字。十五年前陳結之。

見敏中初到邠寧秋日登城樓詩中頗多鄉思因以寄和

想爾到邊頭。蕭條正值秋。二年貧御史。八月古邠州。絲管聞雖樂。風沙見亦愁。望鄉心若苦。不用數登樓。

齋戒

每因齋戒斷葷腥。漸覺塵勞染愛輕。六賊定知無氣色。三尸應恨少恩情。酒魔降伏終須盡。詩債填還亦欲平。從此始堪爲弟子。竺乾師是古先生。

戲禮經老僧

香火一爐燈一盞。白頭夜禮佛名經。何年飲著聲門酒。直到如今醉未醒。

近見慕巢尙書詩中屢有歎老思退之意。又於洛下新置郊居。然寵寄方深。歸心太速。因以長句戲而諭之。

近見詩中歎白鬚。遙知閩外憶東都。烟霞偷眼窺來久。富貴粘身攏得無。新置林園猶淺落。未終婚嫁且踟蹰。應須待到懸車歲。然後東歸伴老夫。

對鏡偶吟贈張道士抱元

閑來對鏡自思量。年自衰殘分所當。白髮萬莖何所怪。丹砂一粒不曾嘗。眼昏久被書科理。肺渴多因酒損傷。今日逢師雖已晚。枕中治老有何方。

病入新正

枕上驚新歲。花前念舊歡。是身老所逼。非意病相干。風月情猶在。盃觴興漸闌。便休心未伏。更試一春看。

臥疾來早晚

臥疾來早晚。懸懸將十旬。婢能尋本草。犬不吠醫人。酒醞全生醜。歌筵半委塵。風光還欲好。爭向枕前春。

強起迎春戲寄思黯

杖策人扶廢病身。晴和強起一迎春。他時蹇跛縱行得。笑殺平原樓上人。

夢得前所酬篇有鍊盡美少年之句。因思往事。兼詠今懷。重以長句答之。

鍊盡少年成白首。憶初相識到今朝。昔饒春桂長先折。今伴寒松最後凋。生事縱貧猶可過。風情雖老未全銷。聲華寵命人皆得。若箇如君歷七朝。

病後寒食

故紗絳帳舊青氈。藥酒醺醺引醉眠。斗藪弊袍春晚後。摩挲病脚日陽前。行無筋力尋山水。坐少精神聽管絃。拋擲風光負寒食。曾來未省似今年。

老病相仍以詩自解

榮枯憂喜與彭殤。都似人間戲一場。蟲臂鼠肝猶不怪。雞膚鶴髮復何傷。昨因風發甘長往。今遇陽和又小康。遠似遠行裝束了。遲迴且住亦何妨。

皇甫郎中親家翁赴任絳州。宴送出城贈別。

慕賢入室交先定。結援通家好復成。新婦不嫌貧活計。嬌孫同慰老心情。洛橋歌酒今朝散。絳路風烟幾日行。欲識離羣相戀意。爲君扶病出都城。

春暖

風痺宜和暖。春來脚校輕。鶯留花下立。鶴引水邊行。髮少嫌巾重。顏衰訝鏡明。不論親與故。自亦昧平生。

殘春晚起伴客笑談

掩戶下簾朝睡足。一聲黃鳥報殘春。披衣岸幘日高起。兩角青衣扶老身。策杖強行過里巷。引盃閑酌伴親賓。莫言病後妨談笑。猶恐多於不病人。

送唐州崔使君侍親赴任

連持使節歷專城。獨賀崔侯最慶榮。烏府一拋霜簡去。朱輪四從板輿行。發時正許沙鷗送。到日方乘竹

馬迎。唯慮郡齋賓友少。數盃春酒共誰傾。

春晚詠懷贈皇甫朗之

豔陽時節又蹉跎。遲暮光陰復若何。一歲中分春日少。百年通計老時多。多中更被愁牽引。少裏兼遭病折磨。賴有銷憂治悶藥。君家濃酎我狂歌。

春盡日宴罷感事獨吟

五年三月今朝盡。客散筵空獨掩扉。病與樂天相伴住。春隨樊素一時歸。閑聽鶯語移時立。思逐楊花觸處飛。金帶絕腰衫委地。年年衰瘦不勝衣。

病中辱崔宣城長句見寄兼有魍魎之贈。因以四韻摠而酬之。

劉楨病發經春臥。謝朓詩來盡日吟。三道舊誇收片玉。一章新喜獲雙金。信題霞綺絨情重。酒試銀觥表分深。科第門生滿霄漢。歲寒少得似君心。

前有別柳枝絕句。夢得繼和云。春盡絮飛留不得。隨風好去落誰家。又復戲答。柳老春深日又斜。任他飛向別人家。誰能更學孩童戲。尋逐春風捉柳花。

池上早夏

水積春塘晚。陰交夏木繁。舟船如野渡。籬落似江村。靜拂琴牀席。香開酒庫門。慵閑無一事。時弄小嬌孫。談氏外孫生三日。喜是男。偶吟成篇。兼戲呈夢得。

玉牙珠顆卜男兒。羅薦蘭湯浴罷時。芡苢春來盈女手。梧桐老去長孫枝。慶傳媒氏燕先賀。喜報談家烏

預知明日貧翁具難黍。應須酬賽引難詩。

開成大行皇帝挽歌詞四首

御宇恢皇化。傳家叶至公。華夷臣妾內。堯舜弟兄中。制度移民俗。文章變國風。開成與貞觀。實錄事多同。

又一首

晏駕辭雙闕。靈儀出九衢。上雲歸碧落。下席葬蒼梧。冀晚餘堯曆。龜新啓夏圖。三朝聯棣萼。從古帝王無。

又一首

嚴恭七月禮。哀慟萬人心。地感騰秋氣。天愁結夕陰。鼎湖龍漸遠。濛汜日初沉。唯有雲韶樂。長留治世音。

又一首

化成同軌表清平。恩結連枝感聖明。帝與九齡雖吉夢。山呼萬歲是虛聲。月低儀仗辭蘭路。風引笳簫入柏城。老病龍髯攀不及。東周退傅最傷情。

時熱少見客因詠所懷

冠櫛心多懶。逢迎興漸微。况當時熱甚。幸遇客來稀。濕灑池邊地。涼開竹下扉。露牀青篾簟。風架白蕉衣。院靜留僧宿。樓空放妓歸。衰殘強歡宴。此事久知非。

宣州崔大夫閣老忽以近詩數十首見示吟諷之下竊有所喜因成長句寄題郡齋

謝玄暉歿吟聲寢。郡閣寥寥筆硯閑。無復新詩題壁上。虛教遠岫列窗間。忽驚歌雪今朝至。必恐文星昨夜還。再喜宣城章句動。飛觴遙賀敬亭山。

足疾

足疾無加亦不瘳。縣春歷夏復經秋。開顏且酌樽中酒。代步多乘池上舟。幸有眼前衣食在。兼無身後子孫憂。應須學取陶彭澤。但委心形任去留。

晚池汎舟遇景成詠贈呂處士

岸淺橋平池面寬。飄然輕掉汎澄瀾。風宜扇引開懷入。樹礙舟行仰臥看。別境客稀知不易。能詩人少詠應難。唯憐呂叟時相伴。同把磻溪舊釣竿。

夢微之

夜來攜手夢同遊。晨起盈巾淚莫收。漳浦老身三度病。咸陽宿草八迴秋。君埋泉下泥銷骨。我寄人間雪滿頭。阿衛韓郎相次去。夜臺茫昧得知不。

感秋詠意

炎涼遷次速如飛。又脫生衣著熟衣。遠壁暗蛩無限思。戀巢寒燕未能歸。須知流輩年年失。莫歎衰容日日非。舊語相傳聊自慰。世間七十老人稀。

老病幽獨偶吟所懷

眼漸昏昏耳漸聾。滿頭霜雪半身風。已將心出浮雲外。猶寄形於逆旅中。觴詠罷來賓閣閉。笙歌散後妓房空。世緣俗念消除盡。別是人間清淨翁。

和楊尚書罷相後夏日遊永安水亭兼招本曹楊侍郎同行

道行無喜退無憂。舒卷如雲得自由。良冶動時爲哲匠。巨川濟了作虛舟。竹亭陰合偏宜夏。水檻風涼不待秋。遙愛翩翩雙紫鳳。入同官署出同遊。

在家出家

衣食支分婚嫁畢。從今家事不相仍。夜眠身是投林鳥。朝飯心同乞食僧。清淚數聲松下鶴。寒光一點竹間燈。中宵入定跏趺坐。女喚妻呼多不應。

夜涼

露白風清庭戶涼。老人先著夾衣裳。舞腰歌袖拋何處。唯對無絃琴一張。

繼之尙書。自余病來。寄遺非一。又蒙覽醉吟先生傳。題詩以美之。今以此篇用伸酬謝。

衰殘與世日相疎。惠好唯君分有餘。茶藥贈多因病久。衣裳寄早及寒初。交情鄭重金相似。詩韻清鏘玉不如。醉傳狂言人盡笑。獨知我者是尙書。

五年秋病後獨宿香山寺三絕句

經年不到龍門寺。今夜何人知我情。還向暢師房裏宿。新秋月色舊灘聲。飲徒歌伴今何在。雨散雲飛盡不迴。從此香山風月夜。祇應長是一身來。石盆泉畔石樓頭。十二年來晝夜遊。更過今年年七十。假如無病亦宜休。

題香山新經堂招僧

烟滿秋堂月滿庭。香花漠漠磬泠泠。誰能來此尋真諦。白老新開一藏經。

偶題鄧翁

偶因攜酒尋村客。聊復迴車訪薜蘿。宜值雪寒相慰問。不妨春暖更經過。翁居山下年空老。我得人間事校多。一種共翁頭似雪。翁無衣食又如何。

早入皇城贈王留守僕射

津橋殘月曉沈沈。風露淒清禁署深。城柳宮槐護搖落。悲愁不到貴人心。

寄題廬山舊草堂兼呈二林寺道侶

三十年前草堂主。而今雖在鬢如絲。登山尋水應無力。不似江州司馬時。漸伏酒魔休放醉。猶殘口業未拋詩。君行過到鍾峯下。爲報東林長老知。

改業

先生老去飲無興。居士病來閑有餘。猶覺醉吟多放逸。不如禪坐更清虛。柘枝紫袖教丸藥。羯鼓蒼頭遣種蔬。却被山僧戲相問。一時改業意何如。

山下留別佛光和尙

勞師送我下山行。此別何人識此情。我已七旬師九十。當知後會在他生。

山中五絕句 遊嵩陽見五物名有所感。感興不同。隨興而吟。因成五絕。

嶺上雲

嶺上白雲朝未散。田中青麥旱將枯。自生自滅成何事。能逐東風作雨無。

石上苔

漠漠班班石上苔。幽芳靜綠絕纖埃。路傍凡草榮遭遇。曾得七香車輦來。

林下樗

香檀文桂苦鵬鑄。生理何曾得自全。知有無材老樗否。一枝不損盡天年。

澗中魚

海水桑田欲變時。風濤翻覆沸天池。鯨吞蛟鬪波成血。深澗游魚樂不知。

洞中蝙蝠

千年鼠化白蝙蝠。黑洞深藏避網羅。遠害全身誠得計。一生幽暗又如何。

自戲三絕句

閑臥獨吟無人酬。聊假身心相戲往。復偶成章。

心問身

心問身云何泰然。嚴冬煖被日高眠。放君快活知恩否。不早朝來十一年。

身報心

心是身王身是宮。君今居在我宮中。是君家舍君須愛。何事論恩自說功。

心重答身

因我疎慵休罷早。遣君安樂歲時多。世間老苦人何限。不放君閑奈我何。

會昌元年春五絕句

病後喜過劉家

忽憶前年初病後。此生甘分不銜盃。誰能料得今春事。又向劉家飲酒來。

贈舉之僕射

雞毬錫粥屢開筵。談笑謳吟間管絃。一月三迴寒食會。春光應不負今年。

盧尹賀夢得會中作

病聞川守賀筵開。起伴尙書飲一盃。任意少年長笑我。老人自覓老人來。

題朗之槐亭

春風可惜無多日。家醞唯殘軟半瓶。猶望君歸同一醉。籃舁早晚入槐亭。

勸夢得酒

誰人功畫麒麟閣。何客新投魍魅鄉。兩處榮枯君莫問。殘春更醉兩三場。

過裴令公宅二絕句

風吹楊柳出牆枝。憶得同歡共醉時。每到集賢坊北過。不曾一度不低眉。
梁王舊館雪濛濛。愁殺鄒枚二老翁。假使明朝深一尺。亦無人到兔園中。

百日假滿少傅官停自喜言懷

長告今朝滿十旬。從茲蕭灑便終身。老嫌手重拋牙笏。病喜頭輕換角巾。疎傅不朝懸組綬。向平無累畢婚姻。人言世事何時了。我是人間事了人。

早熱

畏景又加旱。火雲殊未收。籬暄飢有雀。池涸渴無鷗。岸幘頭仍痛。褰裳汗亦流。若爲當此日。遷客向炎洲。

題崔少尹上林坊新居

坊靜深居新日幽。忽疑縮地到滄洲。宅東籬缺嵩峯出。堂後池開洛水流。高下三層盤野徑。沿洄十里汎漁舟。若能爲客烹雞黍。願伴田蘇日日遊。

新澗亭

煙蘿初合澗新開。閑上西亭日幾迴。老病歸山應未得。且移泉石就身來。

對酒有懷寄十九郎中

往年江外拋桃葉。去歲樓中別柳枝。寂寞春來一盃酒。此情唯有李君知。吟君舊句情難忘。風月何時是盡時。

楊六尙書頻寄新詩。詩中多有思閑相就之志。因書鄙意。報而諭之。

君年殊未及懸車。未合將閑逐老夫。身健正宜金印綬。位高方稱白髭鬚。若論塵事何由了。但問雲心自在無。進退是非俱是夢。丘中闕下亦何殊。

偶吟自慰兼呈夢得

且喜同年滿七旬。莫嫌衰病莫嫌貧。已爲海內有名客。又占世間長命人。耳裏聲聞新將相。眼前失盡故交親。尊榮富壽難兼得。閑坐思量最要身。

寄潮州繼之

相府潮陽俱夢中。夢中何者是窮通。他時事過方應悟。不獨榮空辱亦空。

雪暮偶與夢得同致仕裴賓客王尙書飲

黃昏慘慘雪霏霏。白首相歡醉不歸。四箇老人三百歲。人間此會亦應稀。

雪朝乘興欲詣李司徒留守。先以五韻戲之。

寒夜生酒思。曉雪引詩情。熱飲一兩盞。冷吟三五聲。鋪花憐地凍。銷玉畏天晴。好拂烏巾出。宜披鶴氅行。梁園應有興。無不召鄒生。

贈思黯

爲憐清淺愛潺湲。一日三迴到水邊。若道歸仁灘更好。主人何故別三年。

聽歌六絕句

聽都子歌

都子新歌有性靈。一聲格轉已堪聽。更聽唱到常娥字。猶有樊家舊典刑。

樂世

管急絃繁拍漸稠。綠腰宛轉曲終頭。誠知樂世聲聲樂。老病人聽未免愁。

水調

五言一遍最殷勤。調少情多似有因。不會當時翻曲意。此聲腸斷爲何人。

想夫憐

玉管朱絃莫急催。客聽歌送十分盃。長愛夫憐第二句。請君重唱夕陽開。

何滿子

世傳滿子是人名。臨就刑時曲始成。一曲四詞歌八疊。從頭便是斷腸聲。

離別難詞

綠楊陌上送行人。馬去車迴一望塵。不覺別時紅淚盡。歸來無淚可霑巾。

閑樂

坐安臥穩輿平肩。倚杖披衫遶四邊。空腹三盃卯後酒。曲肱一覺醉中眠。更無忙苦吟閑樂。恐是人間自在天。

卷六十九

半格詩 律詩附 凡九十五首

立秋夕涼風忽至。炎暑稍消。卽事詠懷。寄汴州節度使李二十尚書。

嫋嫋蒼樹動。好風西南來。紅缸霏微滅。碧幌飄飆開。披襟有餘涼。拂簾無纖埃。但喜煩暑退。不惜光陰催。河秋稍清淺。月午方徘徊。或行或坐臥。體適心悠哉。美人在浚都。旌旗繞樓臺。雖非滄溟阻。難見如蓬萊。蟬迎節又換。雁送書未迴。君位日寵重。我年日摧頹。無因風月下。一舉平生盃。

開成二年夏聞新蟬贈夢得

十載與君別。常感新蟬鳴。今年共君聽。同在洛陽城。噪處知林靜。閒時覺景深。涼風忽嫋嫋。秋思先秋生。殘槿花邊立。老槐陰下行。雖無索居恨。還動長年情。且喜未聾耳。年年聞此聲。

題牛相公歸仁里宅新成小灘

平生見流水。見此轉留連。况此朱門內。君家新引泉。伊流決一帶。洛石砌千拳。與君三伏月。滿耳作潺湲。深處碧磷磷。淺處清濺濺。碕岸束鳴咽。沙汀散淪漣。翻浪雪不盡。澄波空共鮮。兩崖灑瀕口。一泊瀟湘天。曾作天南客。漂流六七年。何山不倚杖。何水不停船。巴峽聲心裏。松江色眼前。今朝小灘上。能不思悠然。

春日閑居三首

陶士愛吾廬。吾亦愛吾屋。屋中有琴書。聊以慰幽獨。是時三月半。花落庭蕪綠。舍上晨鳩鳴。牕間春睡足。睡足起閑坐。景晏方櫛沐。今日非十齋。庖童饋魚肉。飢來恣殮歎。冷熱隨所欲。飽竟快搔把。筋骸無檢束。豈徒暢支體。兼欲遣耳目。便可傲松喬。何假盃中綠。

又一首

廣池春水平。羣魚恣游泳。新林綠陰成。衆鳥欣相鳴。時我亦瀟灑。適無累與病。魚鳥人則殊。同歸於遂性。緬思山梁雉。時哉感孔聖。聖人不得所。慨然歎時命。我今對鱗羽。取樂成謠詠。得所仍得時。吾生一何幸。

又一首

勞者不覺歌。歌其勞苦事。逸者不覺歌。歌其逸樂意。問我逸如何。閑居多興味。問我樂如何。閑官少憂累。

又問俸厚薄。百千隨月至。又問年幾何。七十行欠二。所得皆過望。省躬良可媿。馬閑無羈絆。鶴老有祿位。設自爲化工。優饒只如是。安得不歌詠。默默受天賜。

小閣閑坐

閣前竹蕭蕭。閣下水潺潺。拂簾卷簾坐。清風生其間。靜聞新蟬鳴。遠見飛鳥還。但有巾掛壁。而無客叩關。二疏返故里。四老歸舊山。吾亦適所願。求閑而得閑。

遊平泉宴浥澗宿香山石樓贈座客

逸少集蘭亭。季倫宴金谷。金谷太繁華。蘭亭闕絲竹。何如今日會。浥澗平泉曲。盃酒與管絃。貧中隨分足。紫鮮林筍嫩。紅潤園桃熟。採摘助盤筵。芳滋盈口腹。閑吟暮雲碧。醉舞春草綠。舞妙豔流風。歌清叩寒玉。古詩惜晝短。勸我令秉燭。是夜勿言歸。相攜石樓宿。

池上幽境

裊裊過水橋。微微入林路。幽境深誰知。老身閑獨去。行行何所憂。遇物自成趣。平滑青盤石。低密綠陰樹。石上一素琴。樹下雙草屨。此是榮先生。坐禪三樂處。

夏日閑放

時暑不出門。亦無賓客至。靜室深下簾。小庭新掃地。褰裳復岸幘。閑傲得自恣。朝景枕簟清。乘涼一覺睡。午殮何所有。魚肉一兩味。夏服亦無多。蕉紗三五事。資身既給足。長物徒煩費。若比簞瓢人。吾今太富貴。和思黯居守獨吟偶醉見示六韻。時夢得和篇先成。頗爲麗絕。因添兩韻。繼而美之。

宮漏滴漸闌。城烏啼復歇。此時若不醉。爭奈千門月。主人中夜起。妓燭前羅列。歌袂默收聲。舞臺低赴節。絃吟玉柱品。酒透金盃熱。朱顏忽已酡。清奏猶未闕。妍詞黯先唱。逸韻劉繼發。鏗然雙雅音。金石相磨戛。和夢得洛中早春見贈七韻

衆皆賞春色。君獨憐春意。春意竟如何。老夫知此味。燭餘減夜漏。衾煖添朝睡。恬和臺上風。虛潤池邊地。開遲花養豔。語懶鶯含思。似訝隔年齋。如勸迎春醉。何日同宴遊。心期二月二。

櫻桃花下有感而作

藹藹美周宅。櫻繁春日斜。一爲洛下客。十見池上花。爛熳豈無意。爲君占年華。風光饒此樹。歌舞勝諸家。失盡白頭伴。長成紅粉娃。停盃兩相顧。堪喜且堪嗟。

洗竹

布裘寒擁頸。氈履溫承足。獨立冰池前。久看洗霜竹。先除老且病。次去纖而曲。翦棄猶可憐。琅玕卜餘束。青青復籊籊。頗異凡草木。依然若有情。迴頭語僮僕。小者截魚竿。大者編茅屋。勿作簪與箕。而令糞土辱。

新沐浴

形適外無恙。心恬內無憂。夜來新沐浴。肌髮舒且柔。寬裁夾烏帽。厚絮長白裘。裘溫裹我足。帽暖覆我頭。先進酒一盃。次舉粥一甌。半酣半飽時。四體春悠悠。是月歲陰暮。慘冽天地愁。白日冷無光。黃河凍不流。何處征戍行。何人羈旅遊。窮途絕糧客。寒獄無燈囚。勞生彼何苦。遂性我何優。撫心但自愧。孰知其所由。

三年除夜

晰晰燦火光。氤氳臘酒香。嗤嗤童稚戲。迢迢歲夜長。堂上書帳前。長幼合成行。以我年最長。次第來稱觴。七十期漸近。萬緣心已忘。不唯少歡樂。兼亦無悲傷。素屏畫居士。青衣侍孟光。夫妻老相對。各坐一繩牀。

自題小園

不鬪門館華。不鬪林園大。但鬪爲主人。一坐十餘載。迴看甲乙第。列在都城內。素垣夾朱門。藹藹遙相對。主人安在哉。富貴去不迴。池乃爲魚鑿。林乃爲禽栽。何如小園主。拄杖閑卽來。親賓有時會。翠酒連夜開。以此聊自足。不羨大池臺。

病中宴坐

有酒病不飲。有詩慵不吟。頭眩罷垂釣。手痺休撥琴。竟日悄無事。所居閑且深。外安支離體。中養希夷心。臆戶納秋景。竹木澄夕陰。宴坐小池畔。清風時動襟。

戒藥

促促急景中。蠢蠢微塵裏。生涯有分限。愛戀無終已。早天羨中年。中年羨暮齒。暮齒又貪生。服食求不死。朝吞太陽精。夕吸秋石髓。微福反成災。藥誤者多矣。以之資嗜慾。又望延甲子。天人陰隲間。亦恐無此理。域中有真道。所說不如此。後身如身存。吾聞諸老氏。

贈夢得

前日君家飲。昨日王家宴。今日過我廬。三日三會面。當歌聊自放。對酒交相勸。爲我盡一盃。與君發三願。一願世清平。二願身強健。三願臨老頭。數與君相見。

逸老

白日下駸駸。青天高浩浩。人生在其中。適時卽爲好。勞我以少壯。息我以衰老。順之多吉壽。違之或凶夭。我初五十八。息老雖非早。一閑十三年。所得亦不少。况加祿仕後。衣食常溫飽。又從風疾來。女嫁男婚了。胸中一無事。浩氣凝襟抱。飄若雲信風。樂於魚在藻。桑榆坐已暮。鐘漏行將曉。皤然七十翁。亦足稱壽考。筋骸本非實。一束芭蕉草。眷屬偶相依。一夕同棲鳥。去何有願戀。住亦無憂惱。生死尙復然。其餘安足道。是故臨老心。冥然合玄造。

遇物感興因示子弟

聖擇狂夫言。俗信老人語。我有老狂詞。聽之吾語汝。吾觀器用中。劍銳鋒多傷。吾觀形骸內。勁骨齒先亡。寄言處世者。不可苦剛強。龜性愚且善。鳩心鈍無惡。人賤拾支牀。鶻欺擒暖脚。寄言立身者。不得全柔弱。彼因罹禍難。此未免憂患。于何保終吉。強弱剛柔間。上遵周孔訓。旁鑒老莊言。不唯鞭其後。亦要輓其先。

首夏南池獨酌

春盡雜英歇。夏初芳草深。薰風自南至。吹我池上林。綠蘋散還合。頽鯉跳復沉。新葉有佳色。殘鶯猶好音。依然謝家物。池酌對風琴。慚無康樂作。秉筆思沉吟。境勝才思劣。詩成不稱心。

官俸初罷親故見憂以詩諭之

七年爲少傅。品高俸不薄。乘軒已多慚。况是一病鶴。又及懸車歲。筋力轉衰弱。豈以貧是憂。尙爲名所縛。今春始病免。纓組初擺落。蝸甲有何知。雲心無所著。園中殘舊穀。可備歲飢惡。園中多新蔬。未至食藜藿。

不求安師卜。不問陳生藥。但對丘中琴。時開池上酌。信風舟不繫。掉尾魚方樂。親友不我知。而憂我寂寞。閑居偶吟招鄭庶子皇甫郎中

自哂此迂叟。少迂老更迂。家計一不問。園林聊自娛。竹閒琴一張。池上酒一壺。更無俗物到。但與秋光俱。古石蒼錯落。新泉碧縈紆。焉用車馬客。卽此是吾徒。猶有所思人。各在城一隅。杳然愛不見。搔首方踟蹰。玄晏風韻遠。子真雲貌孤。誠知厭朝市。何必憶江湖。能來小澗上。一聽潺湲無。

亭西牆下伊渠水中置石激流濁湲成韻頗有幽趣以詩記之

嵌巉嵩石峭。皎潔伊流清。立爲遠峯勢。激作寒玉聲。夾岸羅密樹。面灘開小亭。忽疑嚴子瀨。流入洛陽城。是時羣動息。風靜微月明。高枕夜悄悄。滿耳秋泠泠。終日臨大道。何人知此情。此情苟自愜。亦不要人聽。閑題家池寄王屋張道士

有石白磷磷。有水清潺潺。有叟頭似雪。婆娑乎其間。進不趨要路。退不入深山。深山太蕩落。要路多險艱。不如家池上。樂逸無憂患。有食適吾口。有酒醅吾顏。恍惚遊醉鄉。希夷造玄關。五千言下悟。十二年來閑。富者我不顧。貴者我不攀。唯有天壇子。時來一往還。

李廬二中丞各創山居俱誇勝絕然去城稍遠來往頗勞弊居新泉實在宇下偶題十五韻聊戲二君

龍門蒼石壁。洩澗碧潭水。各在一山隅。迢迢幾十里。清鏡碧屏風。惜哉信爲美。愛而不得見。亦與無相似。聞君每來去。矻矻事行李。脂轄復裹糧。心力頗勞止。未如吾舍下。石與泉甚邇。鑿鑿復濺濺。晝夜流不已。

洛石千萬拳。餽波鋪錦綺。海珉一兩片。激瀨含宮徵。綠宜春濯足。淨可朝漱齒。遶砌紫鱗遊。拂簾白鳥起。何言履道叟。便是滄浪子。君若趁歸程。請君先到此。願以潺湲聲。洗君塵土耳。

北窗竹石

一片瑟瑟石。數竿青青竹。向我如有情。依然看不足。况臨北簷下。復近西塘曲。筠風散餘清。苔雨含微綠。有妻亦衰病。無子方老獨。莫掩夜窗扉。共渠相伴宿。

飲後戲示弟子

吾爲爾先生。爾爲吾弟子。孔門有遺訓。復坐吾告爾。先生饌酒食。弟子服勞止。孝敬不在他。在茲而已矣。欲我少愁憂。欲我多歡喜。無如醞好酒。酒須多且旨。旨即賓可留。多即壘不恥。吾更有一言。爾宜聽入耳。人老多憂貧。人病多憂死。我今雖老病。所憂不在此。憂在半酣時。樽空座客起。

閑坐看書貽諸少半

雨砌長寒蕪。風庭落秋果。窗間有閑叟。盡日看書坐。書中見往事。歷歷知福禍。多取終厚亡。疾驅必先墮。勸君少干名。名爲錮身鎖。勸君少求利。利是焚身火。我心知已久。吾道無不可。所以雀羅門。不能寂寞我。

夢上山

夜夢健上山。獨攜藜杖出。千巖與萬壑。遊覽皆周畢。夢中足不病。健似少年日。既悟神返初。依然舊形質。始知形神內。形病神無疾。形神兩是幻。夢寤俱非實。晝行雖蹇澀。夜步頗安逸。晝夜既平分。其間何得失。

對酒閑吟贈同老者

人生七十稀。我年幸過之。遠行將路盡。春夢欲覺時。家事口不問。世名心不思。老既不足歎。病亦不能治。扶持仰婢僕。將養信妻兒。飢飽進退食。寒暄加減衣。聲妓放鄭衛。裘馬脫輕肥。百事盡除去。尙餘酒與詩。興來吟一篇。吟罷酒一卮。不獨適情性。兼用扶衰羸。雲液洒六腑。陽和生四肢。於中我自樂。此外吾不知。寄問同老者。捨此將安歸。莫學蓬心叟。胸中分是非。

晚起閑行

幡然一老子。擁裘仍隱几。坐穩夜忘眠。臥安朝不起。起來無可作。閉日時叩齒。靜對銅爐香。暖漱銀瓶水。午齋何儉潔。餅與蔬而已。西寺講楞伽。閑行一隨喜。

香山居士寫真詩 并序

元和五年。予爲左拾遺翰林學士。奉詔寫真於集賢殿御書院。時年三十七。會昌二年。罷太子少傅。爲白衣居士。又寫真於香山寺藏經堂。時年七十一。前後相望。殆將三紀。觀今照昔。慨然自歎者久之。形容非一。世事幾變。因題六十字以寫所懷。

昔作少學士。圖形入集賢。今爲老居士。寫貌寄香山。鶴鬣變玄髮。雞膚換朱顏。前形與後貌。相去三十年。勿歎韶華子。俄成婆叟仙。請看東流水。亦變作桑田。

二年三月五日。齋畢開素。當食偶吟。贈妻弘農郡君。

睡足支體暢。晨起開中堂。初旭泛簾幕。微風拂衣裳。二婢扶盥櫛。雙童昇簟床。庭東有茂樹。其下多陰涼。前月事齋戒。昨日散道場。以我久蔬素。加籩仍異糧。魴鱗白如雪。蒸炙加桂薑。稻飯紅似花。調沃新酪漿。

佐以醑醑味。閒之椒薤芳。老憐口尙美。病喜鼻聞香。嬌駭三四孩。索哺遠我傍。山妻未舉案。饑叟已先嘗。憶同牢。香初家貧共糟糠。今食且如此。何必烹猪羊。况觀姻族間。夫妻半存亡。偕老不易得。白頭何足傷。食罷酒一盃。醉飽吟又狂。緬想梁高士。樂道喜文章。徒誇五噫作。不解贈孟光。

不出門

彌月不出門。永日無來賓。食飽更拂床。睡覺一懶伸。輕篋白鳥羽。新篔青箭筠。方寸方丈室。空然兩無塵。披衣腰不帶。散髮頭不巾。袒跣北窗下。葛天之遺民。一日亦自足。况得以終身。不知天壤內。目我爲何人。

感舊 并序

故李侍郎杓直長慶元年春薨。元相公微之大和六年秋薨。崔侍郎晦叔大和七年夏薨。劉尙書夢得會昌二年秋薨。四君子予之執友也。二十年間。凋零共盡。唯予衰病。至今獨存。因詠悲懷。題爲感舊。晦叔墳荒草已陳。夢得墓溼上猶新。微之捐館將一紀。杓直歸丘二十春。城中雖有故第宅。庭蕪園廢生荆榛。篋中亦有舊書札。紙穿字蠹成灰塵。平生定交取人窄。屈指相知唯五人。四人先去我在後。一枝蒲柳衰殘身。豈無晚歲新相識。相識面親心不親。人生莫羨苦長命。命長感舊多悲辛。

送毛仙翁 江州司馬時作

仙翁已得道。混迹尋巖泉。肌膚冰雪瑩。衣服雲霞鮮。紺髮絲並綴。齟容花共妍。方瞳點玄漆。高步凌飛煙。幾見桑海變。莫知龜鶴年。所憩九清外。所遊五岳巔。軒昊舊爲侶。松喬難比肩。每嗟人世。人役役如狂顛。孰能脫羈鞅。盡遭名利牽。貌隨歲律換。神逐光陰遷。惟余負憂譴。憔悴溢江壖。衰鬢忽霜白。愁腸如火煎。

羈旅坐多感。徘徊私自憐。睛眺五老峯。玉洞多神仙。何當憫湮厄。授道安虛屣。我師惠然來。論道窮重玄。浩蕩八溟闊。志泰心超然。形骸既無束。得喪亦都捐。豈識椿菌異。那知鵬鷃懸。丹華既相付。促景定常延。玄功曷可報。感極惟勤拳。霓旌不肯駐。又歸武夷川。語罷倏然別。孤鶴昇遙天。賦詩敘明德。永續步虛篇。

達哉樂天行

達哉達哉白樂天。分司東都十三年。七旬纔滿冠已挂。半祿未及車先懸。或伴遊客春行樂。或隨山僧夜坐禪。二年忘却問家事。門庭多草廚少烟。庖童朝告鹽米盡。侍婢暮訴衣裳穿。妻孥不悅甥姪悶。而我醉臥方陶然。起來與爾畫生計。薄產處置有後先。先賣南坊十畝園。次賣東郭五頃田。然後兼賣所居宅。髣髴獲緡二三千。半與爾充衣食費。半與吾供酒肉錢。吾今已年七十一。眼昏鬚白頭風眩。但恐此錢用不盡。卽先朝露歸夜泉。未歸且住亦不惡。飢殮樂飲安穩眠。死生無可無不可。達哉達哉白樂天。

春池閑汎 已下律詩

綠塘新水平。紅檻小舟輕。解纜隨風去。開襟信意行。淺憐清演漾。深愛綠澄泓。白撲柳飛絮。紅浮桃落英。古文科斗出。新葉剪刀生。樹集鶯朋友。雲行鴈弟兄。飛沉皆適性。酣詠自怡情。花助銀盃器。松添玉軫聲。魚跳何事樂。鷗起復誰驚。莫唱滄浪曲。無塵可濯纓。

池上寓興二絕

濠梁莊惠讓相爭。未必人情知物情。獺捕魚來魚躍出。此非魚樂是魚驚。水淺魚稀白鷺飢。勞心瞪目待魚時。外容閑暇中心苦。似是而非誰得知。

宴後題府中水堂贈盧尹中丞

水齋歲久漸荒蕪。自愧甘棠無一株。新酒客來方宴飲。舊堂主在重歡娛。莫言楊柳枝空老。直至櫻桃樹已枯。從我到君十一尹。相看自置府來無。

和敏中洛下卽事

昨日池塘春草生。阿連新有好詩成。花園到處鶯呼入。驄馬遊時客避行。水暖魚多似南國。人稀塵少勝西京。洛中佳境應無限。若欲諳知問老兄。

送敏中新授戶部員外郎西歸

千里歸程三伏天。官新身健馬翩翩。行衝赤日加飧飯。上到青雲穩著鞭。長慶老郎唯我在。客曹故事望君傳。前鴻後鴈行難續。相去迢迢二十年。

南侍御以石相贈助成水聲因以絕句謝之

泉石磷磷聲似琴。閑眠靜聽洗塵心。莫輕兩片青苔石。一夜潺湲直萬金。

閑居自題戲招宿客

水畔竹林邊。閑居二十年。健常攜酒出。病卽掩門眠。解綬收朝珮。褰裳出野船。屏除身外物。擺落世間緣。報曙窗何早。知秋簾最先。微風深樹裏。斜日小樓前。渠口添新石。籬根寫亂泉。欲招同宿客。誰解愛潺湲。

李留守相公見過池上汎舟舉酒話及翰林舊事因成四韻以獻之

引棹尋池岸。移樽就菊叢。何言濟川後。相訪釣船中。白首故情在。青雲往事空。同時六學士。五相一漁翁。

閏九月九日獨飲

黃花叢畔綠樽前。猶有些些舊管絃。偶遇閏秋重九日。東籬獨酌一陶然。自從九月持齋戒。不醉重陽十五年。

覽盧子蒙侍御舊詩。多與微之唱和。感今傷昔。因贈子蒙。題於卷後。

早聞元九詠君詩。恨與盧君相識遲。今日逢君開舊卷。卷中多道贈微之。相看掩淚情難說。別有傷心事。豈知聞道咸陽墳上樹。已抽三丈白楊枝。

寒亭留客

今朝閑坐石亭中。爐火銷殘樽又空。冷落若爲留客住。冰池霜竹雪髯翁。

新小灘

石淺沙平流水寒。水邊斜插一漁竿。江南客見生鄉思。道似嚴陵七里灘。

和李中丞與李給事山居雪夜同宿小酌

憲府觸邪峨豸角。瓊闌駁正犯龍鱗。那知近地齊名客。忽作深山同宿人。一盞寒燈雲外夜。數盃溫酎雪中春。林泉莫作多時計。諫獵登封憶舊臣。

履道西門二首

履道西門有弊居。池塘竹樹遠吾廬。豪華肥壯雖無分。飽暖安閑卽有餘。行竈朝香炊早飯。小園春暖撥新蔬。夷齊黃綺誇芝蕨。比我盤飧恐不如。

履道西門獨掩扉。官休病退客來稀。亦知軒冕榮堪戀。其奈田園老合歸。跛鞮難隨騏驥足。傷禽莫趁鳳凰飛。世間隱得身人少。今我雖愚亦庶幾。

偶吟

人生變改故無窮。昔是朝官今野翁。久寄形於朱紫內。漸抽身入蕙荷中。無情水任方圓器。不繫舟隨去住風。猶有鱸魚蓴菜興。來春或擬往江東。

雪夜小飲贈夢得

同爲懶慢園林客。共對蕭條雨雪天。小酌酒巡銷永夜。大開口笑送殘年。久將時背成遺老。多被人呼作散仙。呼作散仙應有以。曾看東海變桑田。

歲暮夜長病中燈下。聞盧尹夜宴。以詩戲之。且爲來日張本也。

榮鬧興多嫌晝短。衰閑睡少覺明遲。當君秉燭銜盃夜。是我停燈服藥時。枕上愁吟堪發病。府中歡笑勝尋醫。明朝強出須謀樂。不詛車公更詛誰。

病中數會張道士見譏以此答之

亦知數出妨將息。不可端居守寂寥。病卽藥窗眠盡日。興來酒席坐通宵。賢人易狎須勤飲。姹女難禁莫覆燒。張道士輸白道士。一盃沉澹便逍遙。

卯飲

短屏風掩臥牀頭。烏帽青氈白鬢裘。卯飲一盃眠一覺。世間何事不悠悠。

寄題餘杭郡樓兼呈裴使君

官歷二十政。宦遊三十秋。江山與風月。最憶是杭州。北郭沙堤尾。西湖石岸頭。綠觴春送客。紅燭夜回舟。不敢言遺愛。空知念舊遊。憑君吟此句。題向望瀟樓。

楊六尚書留太湖石在洛下。借置庭中。因對舉盃。寄贈絕句。

借君片石意何如。置向庭中慰索居。每就玉山傾一酌。興來如對醉尙書。

喜入新年自詠

白鬚如雪五朝臣。又入新正第七旬。老過占他藍尾酒。病餘收得到頭身。銷磨歲月成高位。比類時流是幸人。大曆年中騎竹馬。幾人得見會昌春。

灘聲

碧玉斑斑沙歷歷。清流泱泱響泠泠。自從造得灘聲後。玉管朱絃可要聽。

老題石泉

殷勤傍石遶泉行。不說何人知我情。漸恐耳聾兼眼暗。聽泉看石不分明。

送王卿使君赴任蘇州。因思花迎新使。感舊遊。寄題郡中木蘭西院。

一別蘇州十八載。時光人事隨年改。不論竹馬盡成人。亦恐桑田變爲海。鶯入故宮含意思。花迎新使生光彩。爲報江山風月知。至今白使君猶在。

出齋日喜皇甫十早訪

三旬齋滿欲銜盃。平旦敲門門未開。除却朗之攜一榼。的應不是別人來。

會昌二年春題池西小樓

花邊春水水邊樓。一坐經今四十秋。望月橋傾三遍換。採蓮船破五迴修。園林一半成喬木。鄰里三分作白頭。蘇李冥濠隨燭滅。陳樊漂泊逐萍流。雖貧眼下無妨樂。縱病心中不與愁。自笑靈光巋然在。春來遊得且須遊。

酬南洛陽早春見贈

物華春意尚遲迴。賴有東風晝夜催。寒繖柳腰收未得。暖熏花口噤初開。欲披雲霧聯襟去。先喜瓊琚入袖來。久病長齋詩老退。爭禁年少洛陽才。

對新家醞甑自種花

香麴親看造。芳叢手自栽。迎春報酒熟。垂老看花開。紅蠟半含萼。綠油新醞醅。玲瓏五六樹。漱澗兩三盃。恐有狂風起。愁無好客來。獨酣還獨語。待取月明迴。

攜酒往朗之莊居同飲

慵中又少經過處。別後都無勸酒人。不挈一壺相就醉。若爲將老度殘春。

以詩代書酬慕巢尙書見寄

書意詩情不偶然。苦云夢想在林泉。願爲愚谷烟霞侶。思結空門香火緣。每愧尙書情眷眷。自憐居士病綿綿。不知待得心期否。老校於君六七年。

春盡日

芳景銷殘暑氣生。感時思事坐含情。無人開口共誰語。有酒回頭還自傾。醉對數叢紅芍藥。渴嘗一盃綠
昌明。春歸似遣鶯留語。好住林園三兩聲。

招山僧

能入城中乞食否。莫辭塵土污袈裟。欲知住處東城下。遶竹泉聲是白家。

夏日與閑禪師林下避暑

落景牆西塵土紅。伴僧閑坐竹泉東。綠蘿潭上不見日。白石灘邊長有風。熱惱漸知隨念盡。清涼常願與
人同。每因毒暑悲親故。多在炎方瘴海中。

題新澗亭兼酬寄朝中親故見贈

何處披襟風快哉。一亭臨澗四門開。金章紫綬辭腰去。白石清泉就眼來。自得所宜還獨樂。各行其志莫
相哈。禽魚出得池籠後。縱有人呼可更迴。

病中看經贈諸道侶

右眼昏花左足風。金篦石水用無功。不如迴念三乘樂。便得浮生百疾空。無子同居草菴下。有妻偕老道
場中。何煩更請僧爲侶。月正新歸伴病翁。

遊豐樂招提佛光三寺

竹鞋萸扇白綃巾。林野爲家雲是身。山寺每遊多寄宿。都城暫出卽經旬。漢容黃綺爲逋客。堯放巢由作

外臣。昨日制書臨郡縣。不談愚谷醉鄉人。

醉中得上都親友書。以予停俸多時。憂問貧乏。偶乘酒興。詠而報之。
頭白醉昏昏。狂歌秋復春。一生耽酒客。五度棄官人。異世陶元亮。前身劉伯倫。臥將琴作枕。行以鍾隨身。歲要衣三對。年支穀一困。園葵烹佐飯。林葉掃添薪。沒齒甘蔬食。搖頭謝摺紳。自能拋爵祿。終不惱交親。但得盃中潑。從生甑上塵。煩君問生計。憂醒不憂貧。

池畔逐涼

風清泉冷竹脩脩。三伏炎天涼似秋。黃犬引迎騎馬客。青衣扶下釣魚舟。衰容自覺宜閑坐。蹇步誰能更遠遊。料得此身終老處。只應林下與灘頭。

池鶴八絕句

雞贈鶴

一聲警露君能薄。五德司晨我用多。不會悠悠時俗士。重君輕我意如何。

鶴答雞

爾爭伉儷泥中鬪。吾整羽儀松上棲。不可遣他天下眼。却輕野鶴重家雞。

烏贈鶴

與君白黑太分明。縱不相親莫見輕。我每夜啼君怨別。玉徽琴裏忝同聲。

鶴答烏

吾愛棲雲上華表。汝多攫肉下田中。吾音中羽汝聲角。琴曲雖同調不同。

鳶贈鶴

君誇名鶴我名鳶。君叫聞天我唳天。更有與君相似處。飢來一種啄腥羶。

鶴答鳶

無妨自是莫相非。清濁高低各有歸。鸞鶴羣中彩雲裏。幾時曾見喘鳶飛。

鵝贈鶴

君因風送入青雲。我被人驅向鴨羣。雪頸霜毛紅網掌。請看何處不如君。

鶴答鵝

右軍歿後欲何依。只合隨雞逐鴨飛。未必犧牲及吾輩。大都我瘦勝君肥。

談氏小外孫王童

外翁七十孫三歲。笑指琴書欲遣傳。自念老夫今耄矣。因思稚子更茫然。中郎餘慶鍾羊祜。子幼能文似馬遷。才與不才爭料得。東床空後且嬌憐。

送後集往廬山東林寺兼寄雲臯上人

後集寄將何處去。故山迢遞在匡廬。舊僧獨有雲臯在。三二年來不得書。別後道情添幾許。老來筋力又何如。來生緣會應非遠。彼此年過七十餘。

客有說

近有人從海上回。海山深處見樓臺。中有仙龕虛一室。多傳此待樂天來。

答客說

吾學空門非學仙。恐君比說是虛傳。海山不是吾歸處。歸卽應歸兜率天。

哭劉尚書夢得二首

四海齊名白與劉。百年交分兩綢繆。同貧同病退閑日。一死一生臨老頭。盃酒英雄君與操。文章微婉我知丘。賢豪雖歿精靈在。應共微之地下遊。

今日哭君吾道孤。寢門淚滿白髭鬚。不知箭折弓何用。兼恐唇亡齒亦枯。窅窅窮泉埋寶玉。駸駸落景掛桑榆。夜臺暮齒期非遠。但問前頭相見無。

卷七十

淮南節度使檢校尚書右僕射趙郡李公家廟碑銘 并序

王建侯。侯建廟。廟有器。器有銘。所以論譔先德。明著後代。或書於鼎。或文於碑。古今之通制也。維開成某年某月某日。宣武軍節度使檢校尚書右僕射汴洲刺史上柱國賜紫金魚袋趙郡李公齋沐祇慄。拜章上言。請立先廟。以奉常祀。於是得請於天子。承式於有司。是歲某月某日。經始於東都。明年某月某日。有事於新廟。外盡其物。內盡其志。三獻百順。神格禮成。其友居易以李氏宗祖世家名爵與僕射志行官業。書於麗牲之碑。謹按家略。九代祖善權。後魏譙郡守。八代祖延觀。徐梁二州刺史。七代祖續。某郡太守。六

代祖顯達。隋潁州刺史。五代祖遷。皇朝某某二州別駕。贈德州刺史。高祖孝卿。右散騎常侍。贈鄧州刺史。曾祖府君諱敬玄。總章儀鳳間。歷吏部尚書。同中書門下三品。中書令弘文館大學士。監修國史。封趙國公。諡曰文憲。才智職業。載在國史。今祭於第一室。以妣蒯國夫人苑陽盧氏配焉。王父府君諱守一。屬世難家徙。不求聞達。避榮樂道。與時浮沉。終成都府郫縣令。今祭於第二室。以妣榮陽夫人鄭氏配焉。先考府君諱晤。歷金壇烏程晉陵三縣令。府君爲人篤於家行。飾以吏事。動有常度。居無惰容。所莅之邑。有善政。辭滿之日。多遺愛。不登貴仕。其命矣夫。今祭於第三室。以先妣上谷夫人范陽盧氏配焉。府君累贈至尚書右僕射。夫人累贈至上谷郡太夫人。前後凡三追命。六告身。渥澤疊洽。自葉流根。從子貴也。郫縣臬晉陵府君咸善積於躬。道屈於位。儲祉流慶。而僕射生焉。僕射名紳。字公垂。六歲丁晉陵府君憂。孺慕號踊如成人禮。九歲終制。孝養上谷太夫人。年雖幼。承順無違。家雖貧。甘旨無闕。侍親之疾。冠帶不解者三載。餘可知也。執親之喪。水漿不入口者五日。餘可知也。先是祖妣考妣晉陵府君前娶夫人裴氏無子。早卒。伯叔父兄妹之嬪咸未歸。各處一方。公在斬縗中。親護九喪。匍匐萬里。及期。喪事禮無闕達。至誠感神。有靈烏瑞芝之應。事動鄉里。名聞公卿。言孝友者以爲表率。憲宗嗣統三年。李鏐盜據京口。公寓居無錫。會擢第東歸。鏐聞公名。署職引用。初詢以謀畫。結舌不對。次強以章檄。絕筆不書。誘之以厚利。不從。迫之以淫刑。不動。將戮辱者數四。就幽囚者七旬。誠貫神明。有死無二。言名節者以爲準程。朝廷嘉之。拜右拾遺。歲餘。穆宗知公忠孝文行。召入翰林。特授司封員外郎。知制誥。遷中書舍人。承顏造膝。知無不言。獻替啓沃。如石投水。俄拜御史中丞。戶部侍郎。旣而望屬台衡。朝當晏駕。時移世變。遂出掾高要。佐潯陽。旋

爲滌壽二州刺史。大凡公之爲政也。應用無方。所居必化。臥理二郡。以去害爲先。故有盜奔獸依之感。廉察浙右。以分憂爲切。故有卹鄰活殍之惠。尹正河洛。以革弊爲急。故有摘奸抉蠹之威。文宗知公全才。以汴難理。乃授鈇鉞。俾鎮綏之初。宣武師人驕強狠悍。犷亂徼利。積習生常。公旣下車。盡知情僞。刑賞信惠。合以爲用。一年而下懲勸。二年而下服畏。三年而下恥格。肅然不變。薰然大和。撫之五年。人俗歸厚。至於捍大患。禦大災。却飛蝗。遏暴水。致歲於豐稔。免人於墊溺。噫。微公之力。汴之民其爲殲乎。其爲魚乎。殊績尤課。不可具舉。天下征鎮。淮海爲大。非公作帥。不足以長束諸侯。制加銀青光祿大夫。揚州長史。淮南諸道節度觀察等使。餘如故。詔下之日。出次于外。軍門不擊柝。里巷無吠犬。從容五日。按節而東。百姓三軍挈壺漿。捧箠醪。遮道攀餞者。動以萬輩。皆嗚咽流涕。如嬰兒之別慈母焉。噫。若非襦袴之惠。及其幼雞豚之養。及其老。又推赤心置人腹中者。則安能化暴戾之俗。一至於此乎。西人泣送。東人歌迎。梁楚千里。風變化移。膏雨景星。所至蒙福。于時開成會昌之際。上方致理。公未登庸。顯顯蒼生。環望而已。盛矣哉。大丈夫生於世也。以忠貞奉于君。以義利惠乎人。以黻冕貴乎身。以宗廟顯乎親。以孝敬交乎神。宜其荷百祿。輔一德。爲有唐之宗臣者歟。君子謂李氏之廟也。休哉。公之祭也。順哉。然曰。有孫如此。有子如此。可謂孝也。故其碑銘云。

祭祀從貴。爵土有秩。諸侯之廟。一宮三室。皇皇西室。皇祖中書。孝孫追遠。昭穆有初。顯顯中室。王父郛令。順孫祇享。盡愨盡敬。肅肅東室。先考晉陵。嗣子奉薦。孝思蒸蒸。嗣子其誰。僕射公垂。公垂翼翼。齊嚴諒直。爲子爲臣。有典有則。載膺休命。載踐右職。以孝肥家。以忠肥國。乃授侯伯。纛鉞旂戟。乃饗祖禰。牲牢黍稷。

家聲振耀。國典褒飾。六命徽章。三世血食。光大遺訓。顯揚先德。子孫承之。垂裕無極。

白蘋洲五亭記

湖州城東南二百步。抵霅溪。連汀洲。洲一名白蘋。梁吳興守柳惲於此賦詩云。汀洲採白蘋。因以爲名也。前不知幾十萬年。後又數百載。有名無亭。鞠爲荒澤。至大曆十一年。顏魯公眞卿爲刺史。始剪榛導流。作八角亭以游息焉。旋屬災潦。薦至沼堙。臺圯。後又數十載。委無隙地。至開成三年。弘農楊君爲刺史。乃疏四渠。濬二池。樹三園。五亭。卉木荷竹。舟橋廊室。泊遊宴息宿之具。靡不備焉。觀其架大溪。跨長汀者。謂之白蘋亭。介二園。閱百卉者。謂之集芳亭。面廣池。目列岫者。謂之山光亭。翫晨曦者。謂之朝霞亭。狎清漣者。謂之碧波亭。五亭間開。萬象迭入。嚮背俯仰。勝無遁形。每至汀風春。溪月秋。花繁鳥啼之旦。蓮開水香之夕。賓友集。歌吹作。舟棹徐動。觴詠半酣。飄然恍然。遊者相顧。咸曰。此不知方外也。人間也。又不知蓬瀛崑閩復何如哉。時予守官在洛陽。君緘書贖圖。請予爲記。予按圖握筆。心存目想。覩縷梗概。十不得其二三。大凡地有勝境。得人而後發。人有心匠。得物而後開。境心相遇。固有時耶。蓋是境也。實柳守濫觴之。顏公椎輪之。楊君績素之。三賢始終。能事畢矣。楊君前牧舒。舒人治。今牧湖。湖人康。康之由。革弊興利。若改茶法。變稅書之類。是也。利興。故府有羨財。政成。故居多暇日。是以餘力濟高情。成勝概。三者旋相爲用。豈偶然哉。昔謝柳爲郡。樂山水。多高情。不聞善政。龔黃爲郡。憂黎庶。有善政。不聞勝概。兼而有者。其吾友楊君乎。君名漢公。字用父。恐年祀久遠。來者不知。故名而字之。時開成四年十月十五日記。

畫西方幀記 開成五年三月十五日

我本師釋迦如來說言。從是西方過十萬億佛土。有世界號極樂。以無八苦四惡道故也。其國號淨土。以無三毒五濁業故也。其佛號阿彌陀。以壽無量願無量功德相好光明無量故也。諦觀此娑婆世界。微塵衆生。無賢愚。無貴賤。無幼艾。有起心歸佛者。舉手合掌。必先嚮西方。怖厄苦惱者。開口發聲。必先念阿彌陀佛。又範金合土。刻石織文。乃至印水聚沙。童子戲者。莫不率以阿彌陀佛爲上首。不知其然而然。由是而觀。是彼如來有大誓願於此衆生。此衆生有大因緣於彼國土明矣。不然者。東南北方過去見在未來。佛多矣。何獨如是哉。何獨如是哉。唐中大夫太子少傅上柱國馮翊縣開國侯賜紫金魚袋白居易。常衰暮之歲。中風痺之疾。乃捨俸錢三萬。命工人杜宗敬。按阿彌陀無量壽二經。畫西方世界一部。高九尺。廣丈有三尺。彌陀尊佛坐中央。觀音勢至二大士侍左右。天人瞻仰。眷屬圍繞。樓臺妓樂。水樹花鳥。七寶嚴飾。五彩彰施。爛爛煌煌。功德成就。弟子居易焚香稽首。跪於佛前。起慈悲心。發弘誓願。願此功德迴施一切衆生。一切衆生。有如我老者。如我病者。願皆離苦得樂。斷惡修善。不越南部。便覩西方。白毫大光。應念來感。青蓮上品。隨願往生。從見在身。盡未來際。常得親近而供養也。欲重宣此願而偈讚云。

極樂世界清淨土。無諸惡道及衆苦。願如老身病苦者。同生無量壽佛所。

畫彌勒上生幀記

南瞻部洲大唐國東都香山寺居士太原人白樂天。年老病風。因身有苦。遍念一切惡趣衆生。願同我身。離苦得樂。由是命繪事。按經文。仰兜率天宮。想彌勒內衆。以丹素金碧形容之。以香火花果供養之一禮。一贊。所生功德。若我老病苦者。皆得如本願焉。本願云何。先是樂天歸三寶。持十齋。受八戒者。有年歲矣。

常日日焚香佛前。稽首發願。願當來世。與一切衆生。同彌勒上生。隨慈氏下降。生生劫劫。與慈氏俱。永離生死流。終成無上道。今因老病。重此證明。所以表不忘初心。而必果本願也。慈氏在上。實聞斯言。言訖作禮。自爲此記。時開成五年三月日記。

香山寺新修經藏堂記

先是樂天發願修香山寺。既就。迨今七八年。寺有佛像。有僧徒。而無經典。寂寥精舍。不聞法音。三寶闕一。我願未滿。乃於諸寺藏外。雜散經中。得遺編墜軸者數百卷帙。以開元經錄案而校之。於是絕者續之。亡者補之。稽諸藏目。名數乃足。合是新舊大小乘經律論集。凡五千二百七十卷。乃作六藏。分而護焉。寺西北隅有隙屋三間。土木將壞。乃增修改飾。爲經藏堂。堂東西間闢四牕。置六藏。藏二門。啓閉有時。出納有籍。堂中間置高廣佛坐一座。上列金色像五百像。後設西方極樂世界圖一。菩薩影二。環座懸文幡二十有四。榻席巾几。洎供養之器。咸具焉。合爲道場。簡儉嚴淨。開成五年九月二十五日。堂成。藏成。道場成。以香火爨之。以飲食樂之。以管磬歌舞供養之。與閑振源。濟劍操。洲暢八長老及比丘衆百二十人。圍繞讚歎之。又別募清淨七人。日日拱齋粥。給香燭。十二部經。次第諷讀。俾夫經梵之音。晝夜相續。洋洋乎盈耳。哉。忻忻乎滿願哉。爾時道場主佛弟子香山居士樂天。欲使浮圖之徒。游者歸依。居者護持。故刻石以記之。

香山寺白氏洛中集記

白氏洛中集者。樂天在洛所著書也。大和三年春。樂天始以太子賓客分司東都。及茲十有二年矣。其間

賦格律詩凡八百首。合爲十卷。今納于龍門香山寺經藏堂。夫以狂簡斐然之文。而歸依支提法寶藏者。於意云何。我有本願。願以今生世俗文字之業。狂言綺語之過。轉爲將來世世讚佛乘之因。轉法輪之緣也。十方三世諸佛應知。噫。經堂未滅。記石未泯之間。乘此願力。安知我他生不復游是寺。復覩斯文。得宿命通。省今日事。如智大師記靈山於前會。羊叔子識金鑲於後身者歟。於戲。垂老之年。絕筆於此。有知我者。亦無隱焉。大唐開成五年十一月二日。中大夫守太子少傅馮翊縣開國侯上柱國賜紫金魚袋白居易。易樂天記。

唐東都奉國寺禪德大師照公塔銘并序

大師號神照。姓張氏。蜀州青城人也。始出家於智凝法師。受具戒於惠萼律師。學心法於惟忠禪師。忠一名南印。卽第六祖之法曾孫也。大師祖達摩宗神會而父事印。其教之大旨。以如然不動爲體。以妙然不空爲用。示真寂而不說斷滅。破計著而不壞假名。師旣得之。揭以行化。出蜀入洛。與洛人有緣。用開六壇。僅三十載。隨根說法。言下多悟。由是裂疑網。拔惑箭。漸離我人相者。日日有焉。起正信。見本覺。頓發菩提心者。時時有焉。其餘退惡進善。隨分而增。上者不可勝紀。夫如是。可不謂煩惱病中師爲醫王乎。生死海中師爲船師乎。嗚呼。病未盡而醫去。海方涉而船失。粵以開成三年冬十二月。示滅於奉國寺禪院。以是月遷葬於龍門山。報年六十三。僧夏四十四。明年。傳教主院上首弟子沙門清閑。糾門徒。合財施。與服勤弟子志行等。營度襄事。卜兆於寶應寺荷澤祖師塔東若干步。窆而塔焉。示不忘其本也。其諸升堂入室。得心要口訣者。有宗實在襄。復儼在洛。道益在鎮。知遠在徐。曰建在晉。道光在潤。道威在潞。雲真在慈。雲

表在汴。歸忍在越。會幽齊。經在蔡。智全。景玄。紹明在秦。各於一方。分作佛事。咸鼓鍾鳴。吼龍象。蹴蹋斯皆。吾師之教力也。不其盛歟。衆以余忝聞法門人。結菩提之緣甚熟。請於塔石序而銘曰。

伊之北西。洛之南東。法祖法孫。歸全於中。

舊塔會公。新塔照公。亦如世禮。祔于本宗。

不能忘情吟 并序

樂天既老。又病風。乃錄家事會經費。去長物。妓有樊素者。年二十餘。綽綽有歌舞態。善唱楊柳。人多以曲名名之。由是名聞洛下。藉在經費中。將放之。馬有駱者。駟壯駿穩。乘之亦有年。籍在長物中。將鬻之。圉人牽馬出門。馬驤首反顧。一鳴。聲音間似知去而旋戀者。素聞馬嘶。慘然立。且拜。婉孌有辭。辭畢涕下。予聞素言。亦愍默不能對。且命迴勒反袂。飲素酒。自飲一盃。快吟數十聲。聲成文。文無定句。句隨吟之短長也。凡二百三十五言。噫。予非聖達。不能忘情。又不至於不及情者。事來攬情。情動不可柅。因自哂題其篇曰。不能忘情吟。吟曰。

鬻駱馬兮。放楊柳枝。掩翠黛兮。頓金羈。馬不能言兮。長鳴而却顧。楊柳枝再拜長跪而致辭。辭曰。主乘此駱五年。凡千有八百日。銜鑿之下。不驚不逸。素事主十年。凡三千有六百日。巾櫛之間。無違無失。今素貌雖陋。末至衰摧。駱力猶壯。又無虺隤。卽駱之力。尙可以代主一步。素之歌。亦可以送主一盃。一旦雙去。有去無迴。故素將去。其辭也苦。駱將去。其鳴也哀。此人之情也。馬之情也。豈主君獨無情哉。予俯而歎。仰而吟。且曰。駱爾勿嘶。素爾勿啼。駱反廐。素反閨。吾疾雖作。年雖頽。幸未及項籍之將死。亦何必一日之

內。棄。雕。兮。而。別。虞。兮。乃。目。素。兮。素。兮。爲。我。歌。楊。柳。枝。我。姑。酌。彼。金。罍。我。與。爾。歸。醉。鄉。去。來。

六讚偈 并序

樂天常有願。願以今生世俗文筆之因。翻爲來世讚佛乘。轉法輪之緣也。今年登七十。老矣病矣。與來世相去甚邇。故作六偈。跪唱於佛法僧前。欲以起因發緣。爲來世張本也。

讚佛偈

十方世界。天上天下。我今盡知。無如佛者。堂堂巍巍。爲天人師。故我禮足。讚歎歸依。

讚法偈

過見當來。千萬億佛。皆因法成。法從經出。是大法輪。是大寶藏。故我合掌。至心迴向。

讚僧偈

緣覺聲聞。諸大沙門。漏盡果滿。衆中之尊。假和合力。求無上道。故我稽首。和南僧寶。

衆生偈

毛道凡夫。火宅衆生。胎卵溼化。一切有情。善根苟種。佛果終成。我不輕汝。汝無自輕。

懺悔偈

無始劫來。所造諸罪。若輕若重。無小無大。我求其相。中間內外。了不可得。是名懺悔。

發願偈

煩惱願去。涅槃願住。十地願登。四生願度。佛出世時。願我得親。最先勸請。請轉法輪。佛滅度時。願我得值。

最後供養受苦提記。

卷七十一

刑部尙書致仕太原 居易

律詩 五言 七言 凡一百首

昨日復今辰

昨日復今辰。悠悠七十春。所經多故處。却想似前身。散秩優游老。閑居清淨貧。螺杯中有物。鶴鬣上無塵。解珮收朝帶。抽簪換野巾。風儀與名號。別是一生人。

病瘡

門有醫來往。庭無客送迎。病銷談笑興。老足歎嗟聲。鶴伴臨池立。人扶下砌行。脚瘡春斷酒。那得有心情。游趙村杏花

游村紅杏每年開。十五年來看幾迴。七十三人難再到。今春來是別花來。

刑部尙書致仕

十五年來洛下居。道緣俗累兩何如。迷路心迴因向佛。宦途事了是懸車。全家遁世曾無悶。半俸資身亦有餘。唯是名銜人不會。毗耶長者白尙書。

初致仕後戲酬留守牛相公 并呈分司諸寮友

南北東西無所羈。挂冠自在勝分司。探花嘗酒多先到。拜表行香盡不知。炮筩烹魚飽煖後。擁袍枕臂醉眠時。報君一語君應笑。兼亦無心羨保釐。

問諸親友

七十人難到。過三更較稀。占花租野寺。嗜酒典朝衣。趁醉春多出。貪歡夜未歸。不知親故口。道我是耶非。

戲問牛司徒

斗藪塵纓將白鬚。半酣扶起問司徒。不知詔許懸車後。醉舞狂歌有例無。

不與老爲期

不與老爲期。因何兩鬢絲。纔應免天促。便已及衰羸。昨夜夢何在。明朝身不知。百憂非我所。三樂是吾師。閉日常閑坐。低頭每靜思。存神機慮息。養氣語言遲。行亦攜詩篋。眠多枕酒卮。自慚無一事。少有不安時。

開龍門八節石灘詩二首 并序

東都龍門潭之南。有八節灘。九峭石。船筏過此。例反破傷。舟人楫師推挽束縛。大寒之月。裸跣水中。飢凍有聲。聞於終夜。予嘗有願。力及則救之。會昌四年。有悲智僧道遇。適同發心。經營開鑿。貧者出力。仁者施財。於戲。從古有礙之險。未來無窮之苦。忽乎一旦。盡除去之。茲吾所用。適願快心。拔苦施樂者耳。豈獨以功德福報爲意哉。因作二詩。刻題石上。以其地屬寺。事因僧故。多引僧言見志。

鐵鑿金鎚殷若雷。八灘九石劍稜摧。竹篙桂楫飛如箭。百筏千艘魚貫來。振錫導師憑衆力。揮金退傅施家財。他時相逐西方去。莫慮塵沙路不開。

七十三翁旦暮身。誓開險路作通津。夜舟過此無傾覆。朝脛從今免苦辛。十里叱灘變河漢。八寒陰獄化陽春。我身雖歿心長在。閻施慈悲與後人。

閑坐

婆娑放雞犬。嬉戲任兒童。獨坐槐陰下。開襟向晚風。漚麻池水裏。曬棗日陽中。人物何相稱。居然田舍翁。

酬寄牛相公同宿話舊勸酒見贈

每來故事堂中宿。共憶華陽觀裏時。日暮獨歸愁未盡。泥深同出借驢騎。交遊今日唯殘我。富貴當年更有誰。彼此相看頭雪白。一盃可合重推辭。

道場獨坐

整頓衣巾拂淨牀。一瓶秋水一爐香。不論煩惱先須去。直到菩提亦擬忘。朝謁久停收劍珮。宴遊漸罷廢壺觴。世間無用殘年處。祗合逍遙坐道場。

偶作寄朗之

歷想爲官日。無如刺史時。歡娛接賓客。飽暖及妻兒。自到東都後。安閑更得宜。分司勝刺史。致仕勝分司。何況園林下。欣然得朗之。仰名同舊識。爲樂卽新知。有雪先相訪。無花不作期。鬪釀乾釀酒。誇妙細吟詩。里巷千來往。都門五別離。岐分兩回首。書到一開眉。葉落槐亭院。冰生竹閣池。雀羅誰問訊。鶴氅罷追隨。身與心俱病。容將力共衰。老來多健忘。唯不忘相思。

狂吟七言十四韻

亦知世是休明世。自想身非富貴身。但恐人間爲長物。不如林下作遺民。遊依二室成三友。住近雙林當四鄰。性海澄滄平少浪。心田洒掃淨無塵。香山閑宿一千夜。梓澤連遊十六春。是客相逢皆故舊。無僧每見不殷勤。藥停有喜閑銷疾。金盡無憂醉忘貧。補綻衣裳愧妻女。支持酒肉賴交親。俸隨日計錢盈貫。祿逐年支粟滿囷。洛堰魚鮮供取足。游村果熟饋爭新。詩章人與傳千首。壽命天教過七旬。點檢一生微倖事。東都除我更無人。

喜裴濤使君攜詩見訪醉中戲贈

忽聞扣戶醉吟聲。不覺停杯倒屣迎。共放詩狂同酒癖。與君別是一親情。

得潮州楊相公繼之書并詩以此寄之

詩情書意兩殷勤。來自天南瘴海濱。初覩銀鉤還啓齒。細吟瓊什欲沾巾。鳳池隔絕三千里。蝸舍沉冥十五春。唯有新昌故園月。至今分照兩鄉人。

宿府池西亭

池上平橋橋下亭。夜深睡覺上橋行。白頭老尹重來宿。十五年前舊月明。

閑眠

暖牀斜臥日曛腰。一覺閑眠百病銷。盡日一飧茶兩碗。更無所要到明朝。

永豐坊西南角園中。有垂柳一株。柔條極茂。白尚書會賦詩。傳入樂府。遍流京都。近有詔旨。取兩枝植於禁苑。乃知一顧增十倍之價。非虛言也。因此偶成絕句。非敢繼和前篇。

白尚書篇云

一樹春風千萬枝。嫩如金色軟於絲。永豐西角荒園裏。盡日無人屬阿誰。

河南尹盧貞和

一樹依依在永豐。兩枝飛去杳無蹤。玉皇曾採人間曲。應逐歌聲入九重。

刑部尚書致仕白居易和

一樹衰殘委泥土。雙枝榮耀植天庭。定知玄象今春後。柳宿光中添兩星。

齋居春夕感事遣懷

齋戒坐三旬。笙歌發四鄰。月明停酒夜。眼闔看花人。賴學空爲觀。深知念是塵。猶思閑語笑。未忘舊交親。久作龍門主。多爲兔苑賓。水嬉歌盡日。雪宴燭通晨。事事皆過分。時時自問身。風光拋得也。七十四年春。每見呂南一郎。中新文。輒竊有所歎惜。因成長句。以詠所懷。

雙金百鍊少人知。縱我知君徒爾爲。望梅閣老無妨渴。畫餅尚書不救飢。白日迴頭看又晚。青雲舉足蹠何遲。壯年可惜虛銷擲。遣把閑杯吟詠詩。

胡吉鄭劉盧張等六賢皆多年壽。予亦次焉。偶於弊居合成尚齒之會。七老相顧。既醉甚歡。靜而思之。此會稀有。因成七言六韻。以紀之。傳好事者。

七人五百七十歲。拖紫紆朱垂白鬚。手裏無金莫嗟歎。樽中有酒且歡娛。詩吟兩句神還王。酒飲三杯氣尚麤。鬼蛾狂歌教婢拍。婆娑醉舞遣孫扶。天年高過二疏傳。人數多於四皓圖。除却三山五天竺。人間此

會更應無。

前懷州司馬安定胡杲年八十九

衛尉卿致仕馮翊吉皎年八十六

前右龍武軍長史滎陽鄭據年八十四

前慈州刺史廣平劉真年八十二

前侍御史內供奉官范陽盧貞年八十二

前永州刺史清河張渾年七十四

刑部尚書致仕太原白居易年七十四

已上七人合五百七十歲。會昌五年三月二十一日於白家履道宅同宴。宴罷賦詩。時祕書監狄兼謨。河南尹盧貞。以年未七十。雖與會而不及列。

歡喜二偈曰

得老加年誠可喜。當春對酒亦宜歡。心中別有歡喜事。開得龍門八節灘。
眼暗頭旋耳重聽。唯餘心口尙醒醒。今朝歡喜緣何事。禮徹佛名百部經。

閑居貧活

冠蓋閑居少。簞瓢陋巷深。稱家開戶牖。量力置園林。儉薄身都慣。營爲力不任。飢烹一斤肉。暖臥兩重衾。
樽有陶潛酒。囊無陸賈金。莫嫌貧活計。更富卽勞心。

贈諸少年

少年莫笑我蹉跎。聽我狂翁一曲歌。入手榮名取雖少。關心穩事得還多。老慚退馬常芻秣。高喜歸鴻脫弋羅。官給俸錢天與壽。些些貧病奈吾何。

感所見

巧者焦勞智者愁。愚翁何喜復何憂。莫嫌山水無人用。大勝籠禽不自由。網外老雞因斷尾。盤中鮮鱠爲吞鉤。誰人會我心中事。冷笑時時一掉頭。

寄黔州馬常侍

閑看雙節信爲貴。樂飲一杯誰與同。可惜風情與心力。五年拋擲在黔中。

和李相公留守題漕上新橋六韻

選石鋪新路。安橋壓古堤。似從銀漢下。落傍玉川西。影定欄干倒。標高華表齊。烟開虹半見。月冷鶴雙栖。材映夔龍小。功嫌元凱低。從容濟世後。餘力及黔黎。

閑居

風雨蕭條秋少客。門庭冷靜晝多關。金羈駱馬近賣却。羅袖柳枝尋放還。書卷略尋聊取睡。酒杯淺把粗開顏。眼昏入夜休看月。脚重經春不上山。心靜無妨喧處寂。機忘兼覺夢中閑。是非愛惡銷停盡。唯寄空身在世間。

新秋夜雨

蟋蟀暮啾啾。光陰不少留。松簷半夜雨。風幌滿牀秋。曙早燈猶在。涼初簾未收。新晴好天氣。誰伴老人遊。

春眠

枕低被暖身安穩。日照房門帳未開。還有少年春氣味。時時暫到睡中來。

喜老自嘲

面黑頭雪白。自嫌還自憐。毛龜蒼下老。蝙蝠鼠中仙。名籍同逋客。衣裝類古賢。裘輕披白氎。靴暖蹋烏氈。周易休開卦。陶琴不上絃。任從人棄擲。自與我周旋。鐵馬因疲退。鉛刀以鈍全。行開第八秩。可謂盡天年。

能無愧

十兩新緜褐。披行暖似春。一團香絮枕。倚坐穩於人。婢僕遣他嘗藥草。兒孫與我拂衣巾。迴看左右能無愧。養活枯殘廢退身。

河陽石尚書破迴鶻迎貴主。過上黨射鷲鷲。繪畫爲圖。猥蒙見示。稱歎不足。以詩美之。

塞北虜郊隨手破。山東賊壘掉鞭收。烏孫公主歸本地。白馬將軍入潞州。劍拔青鱗蛇尾活。弦揮赤羽火星流。須知鳥目猶難漏。縱有天狼豈足憂。畫角三聲刁斗曉。清商一部管絃秋。他時麟閣圖勳業。更合何人居上頭。

自詠老身示諸家屬

壽及七十五。俸需五十千。夫妻皆老日。甥姪聚居年。粥美嘗新米。袍溫換故絛。家居雖蕩落。眷屬幸團圓。置榻素屏下。移爐青帳前。書聽孫子讀。湯看侍兒煎。走筆還詩債。抽衣當藥錢。支分閑事了。把背向陽眠。

自問此心呈諸老伴

朝問此心何所思。暮問此心何所爲。不入公門慵斂手。不看人面免低眉。居士室間眠得所。少年場上飲非宜。閑談麴麴留諸老。美醞徐徐進一卮。心未曾求過分事。身常少有不安時。此心除自謀身外。更問其餘盡不知。

六年立春日人日作

二日立春人七日。盤蔬餅餌逐時新。年方吉鄭猶爲少。家比劉韓未是貧。鄉園節歲應堪重。親故歡遊莫厭頻。試作循潮封眼想。何由得見洛陽春。

齋居偶作

童子裝爐火。行添一炷香。老翁持麈尾。坐拂半張牀。卷幔看天色。移齋近日陽。甘鮮新餅果。穩暖舊衣裳。止足安生理。優閑樂性場。是非一以遣。動靜百無妨。豈有物相累。兼無情可忘。不須憂老病。心是自醫王。

詠身

自中風來三歷閏。從懸車後幾逢春。周南留滯稱遺老。漢上羸殘號半人。薄有文章傳子弟。斷無書札答交親。餘年自問將何用。恐是人間賸長身。

予與山南王僕射。淮南李僕射。事歷五朝。踰三紀。海內年輩今唯三人。榮路雖殊。交情不替。聊題長句。寄舉之公。垂二相公。

故交海內只三人。二坐巖廊一臥雲。老愛詩書還似我。榮兼將相不如君。百年膠漆初心在。萬里烟霄中

路分阿閣鸞。鳳野田鶴。何人信道舊同羣。

讀道德經

玄元皇帝著遺文。鳥角先生仰後塵。金玉滿堂非己物。子孫委蛻是他人。世間盡不關吾事。天下無親於我身。只有一身宜愛護。少教冰炭逼心神。

禽蟲十二章

莊列寓言風騷比興。多假蟲鳥以爲筌蹄。故詩義始於關雎。鵲巢。道說先乎鯤。鵬。蝸。鷓。之類是也。予閑居乘興偶作一十二章。頗類志怪放言。每章可致一哂一哂之外。亦有以自警其衰毫。封執之惑焉。頃如此作。多與故人微之夢得共之。微之夢得嘗云。此乃九奏中新聲。八珍中異味也。有旨哉。有旨哉。今到獨吟。想二君在日。能無恨恨乎。

第一

鷺遠戍己鵲避歲。茲事因何羽族知。疑有鳳王頒鳥曆。一時一日不參差。

第二

水中科斗長成蛙。林下桑蟲老作蛾。蛙跳蛾舞仰頭笑。焉用鯤鵬鱗羽多。

第三

江魚羣從稱妻妾。塞鴈聯行號弟兄。但恐世間真眷屬。親疎亦是強爲名。

第四

蠶老繭成不庇身。蜂飢蜜熟屬他人。須知年老憂家者。恐是二蟲虛苦辛。
第五

阿閣鸚鵡田舍鳥。妍蚩貴賤兩懸殊。如何閉向深籠裏。一種摧頽觸四隅。
第六

獸中刀槍多怒吼。鳥遭羅弋盡哀鳴。羔羊口在緣何事。閹死屠門無一聲。
第七

蠨螟殺敵蚊巢上。蠻觸交爭蝸角中。應似諸天觀下界。一微塵內鬪英雄。
第八

蠪蛸網上罨蜉蝣。反覆相持死始休。何異浮生臨老日。一彈指頃報恩讎。
第九

蟻王化飯爲臣妾。羸母偷蟲作子孫。彼此假名非本物。其間何怨復何恩。
第十

豆苗鹿嚼解烏毒。艾葉雀銜奪燕巢。鳥獸不曾看本草。諳知藥性是誰教。
第十一

一鼠得仙生羽翼。衆鼠相看有羨色。豈知飛上未半空。已作烏鳶口中食。
第十二

鵝乳養鷓遺在水。魚心想子變成鱗。細微幽隱何窮事。知者唯應是聖人。

白氏集後記

白氏前著長慶集五十卷。元微之爲序。後集二十卷。自爲序。今又續後集五卷。自爲記。前後七十五卷。詩筆大小凡三千八百四十首。集有五本。一本在廬山東林寺經藏院。一本在蘇州南禪寺經藏內。一本在東都勝善寺鉢塔院律庫樓。一本付姪龜郎。一本付外孫談閣童。各藏於家。傳於後。其日本新羅諸國。及兩京人家傳寫者。不在此記。又有元白唱和因繼集共十七卷。劉白唱和集五卷。洛下游賞宴集十卷。其文盡在大集內錄出。別行於時。若集內無而假名流傳者。皆謬爲耳。會昌五年夏五月一日。樂天重記。

龍門重修白樂天影堂記

陶毅述

祭法曰。法施於人。則祀之。洛書曰。王者之瑞。則圖之。世稱白傳文行。比造化之功。蓋後之學者。若羣鳥之宗。鳳皇百川之朝。滄海也。乘筆之士。出斯道而取位。卿相者。十七八焉。得不謂法施於人耶。王者之瑞耶。饗廟食。畫雲臺可矣。矧山椒遺像乎。陟彼高崗。慷慨前事。松凋宰樹。蕭瑟古甍之上。伊注逝川。潺湲荒祠之下。歲月未積。棟宇將壞。考其由。中和初。黎民經之。而弗勤詣其製。長興末。秦王修之。而弗至。人神玄感。屬在興運。今居守左相太原武公。自許下之。撫三川也。登鄂丘。望太室。且曰。茲邑也。周公測景之地。土圭在焉。吾當正掬躬言曰。民以報天子。既下車。闢污萊。以實倉廩。寬獄市。以處豪猾。絲是十一之稅。均三千之條。省暇日。巡魏闕。過天街。又曰。茲地也。成王定鼎之郊。土氣猶屬。吾當尋舊地。舉墜典。以壯皇居。遂上章。法象緯。以嚴端門。構鴻梁。而路洛水。絲是知拱辰之位。肅朝天之路。通三載。陟明。我無慚德。廣順三祀。歲在癸丑。暮春之初。予因芟除。入洛。獲謁拜上公。趨魏絳之庭。金石在列。入亞夫之戶。檠戟生風。初揖我。以升降。視禮之也。復接我以酒漿。觀予志也。始三揖而進。終百拜而退。既予旋軫。相訪政事。對曰。河橋破虜之勳。有京觀在。漳水禦守之略。有金湯在。雖三尺童子。盡能知之。子無可述。因以白公影堂爲說。公曰。我武臣也。惟干戈是執。昧俎豆之事。幸爲我序。白氏正勳。及修葺之義。俾後之聞者。足以勤爲善。而嚮令名。是吾志也。雖百金不恡。矧上木乎。予曰。彼白公。服則儒士也。位則文人也。當官隸事。烈有丈夫志。祇於批逆鱗。刺權倖。塞左道。履平坦。鎮陽拒命也。指中人爲制將。救日月之蝕。則戰士心悅。武相遇盜也。責京尹計賊。犯雷霆之怒。則奸臣股慄。杭州救旱。因農源而積湖水。龍門通嶮。出家財而鑿八灘。著策數十篇。

盡王佐之才。有文七十卷。導平生之志。向使得其位而且久。行其道而不疑。以憲宗之神武。可繼文皇也。元和之刑政。自同太宗也。必當華夏宅心。上東封之書。蠻夷屈膝。納蘄街之貢。豈直擒吳定蜀。平一蔡州而已哉。言粗畢。公聳身長揖而言曰。異乎吾之所聞。若此。則白公太才美。實輔相之英者。豈徒丈夫耶。子其行矣。予果得修之。予歸朝未再旬。邸吏捧公書相授。具報訖事。穀素乏口才。加之性懶。蟠桃拂漢。非尺筮可量。直以與公問答。疏之如右。別刊貞石。以俟能者。廣順癸丑歲七月十有二日記。

白氏文集後序

詩文之稱於後世。不知其數千萬家也。至稱於當時。則幾希矣。况稱於外國乎。夫文之粹也。無若昌黎。而當時有人。必以爲惡矣之言。二百年之後。歐陽永叔始得之。壁角之弊篋。故不能無補綴考異之議。詩之聖也。無若少陵。而當時有名。豈文章著之句。及唐之晚。退之微之之輩。始推尊焉。亦不免有亡逸紕繆之論。韓杜既殆乎泯沒矣。猶復不韓杜者乎。獨白樂天何其幸哉。當時則禮吏部舉選人。皆以爲準的。王公卿相。無不讀其文。嫺婦倡妓。無不詠其詞。且長慶集五十卷。微之編焉。而序焉。後集二十卷。自爲序。附長慶集。又續後集五卷。自爲記。附其後。是爲全集。若夫其集之在廬山。在東都。在蘇州。及洛詩。洛中集。因繼集。劉白唱和集等。雖盡在全集中。無一不自記自解焉。於是乎補綴考異。亡逸紕繆。又安在哉。遂至柏其櫃。詩其上矣。夫自寶之如此。人奉之如此。宜哉。稱於後世。稱於外國也矣。在雞林。則宰相以百金換一篇。所謂傳于日本新羅諸國。於戲。菅右相者。國朝詩文之冠冕也。渤海客觀其詩。謂似樂天自書爲榮。豈復右相之獨然而已矣哉。昔者國綱之盛也。文章亦盛也。故世不乏人。學非不粹。大凡秉筆之士。皆以此爲口實。至若倭歌俗謠。小史雜記。暨婦人小子之書。無往而不沾溉。斯集中之殘膏賸馥。專其美於國朝。何其盛哉。嗚呼。國綱之與文章俱廢。而一變入于禪林。禪林嗜枯稿蔬筍之氣。不識臺閣正雅之味。以故斯集不行矣。而後禪林之文亦廢矣。哀哉。天之未喪斯文也。幸有我滕先生。道德文章百世之偉人也。林提學嗣武而起。斯文勃興矣。如拙親炙也。聞先生之品藻古之人材也。到於樂天。則曰。雖有朱紫陽之所謂口津津地之誚。小家數之白俗元輕之異議。好其爲人之醞藉。愛其集語意之平易真率矣。拙也。雖有其

率佛之可疑。讀其集。則快活不可言也。復願學者之周知焉。故命劄劂氏以廣其傳。又壯斯集之不苟也。自校讎焉。庶幾乎無誤歟。且記一時之懷。以貽後人。

戊午秋七月丁亥朔那波道圓書于洛中遠望臺